

Odömännoidi inänite **Pabodo nänö cadota ante yewæmongainta**

Waa quëwencæminimpa, ante

¹ Itota Codito ingante nē cædömo inte botö Pabodobo inömo inte iï cadota ante nē yewæmömo imopa. Wængongui botö imote apænte æninque iïmainö ante aa pegacäimpa. Bitö Pabodobi gote botö pönö cædö ante watapæ apænebi eñencædänimpa, ante angacäimpa.

² Mäninö, Wængongui æbänö pönö cæquiringä, ante watapæ apænedinque tömengä beyæ nē apænegainäni wëenëñedë pönï nänï tæiyæ waëmö yewæmongainö ante botö mäninö ante nē apænebo imopa. ³ Mäninö waa pönï nänö cæquinö ante iinque cæcæte ante cædinque Wængongui tömengä Wengä ingante da pönongä pongacäimpa. Tömengä iñömö waocä onguiñængä nänö baquinque Awënë Dabii wodi Pæingä inte eñagacäimpa. ⁴ Adocä Itota iñömö botö Wengä inongä ingampa, ante tömänäni edonque acædänimpa, ante odömoncæte ante cædinque Wængongui tæi piñænongä inte iïmai cægacäimpa. Iingä Itota Codito mönö Awënë iñömö Tæiyæ Waëmö ewocä inte do wæningä iñongante Mæmpo Wængongui wæætë nangui angä ate ñäni ömæmongacäimpa.

⁵ Ayæ adocä tönö godongämæ cædinque tömengä emöwo beyæ mönitö imönite Wængongui

pönö waadete cægacäimpa. Ayæ, Minitö wabæca wabæca gote apænemini eñëninque tömämæ quëwënäni Itota Codito emöwo ante wede pönëninque në eñente cæte quëwënäni bacädänimpa, ante cædinque Wængonguï adobaï Itota önompo inte mönitö imönite da godongä gotamönipa. ⁶ Ìninque tömämæ quëwënäni inänite Itota Codito, Botö gämænö pödäni, ante aa pedinque minitö iminite adobaï aa pecampa. ⁷ Minitö botö quimini badinque botö ayömö tæiyæ waemö ewocate quëwëmini bacæminimpa, ante Wængonguï cægacäimpa. Ìninque minitö Odömä iñömö quëwëninque Wængonguï quimini iñöminite botö, Acæminimpa, ante iïmaï ante yewæmömopa. Mönö Mæmpo Wængonguï tönö Awënë Itota Codito waadete pönö cæyönate minitö wæætë gänë pönente bacæminimpa, äninque yewæmömopa.

Odömä iñömö eñacæ pöinëmopa, ante

⁸ Minitö æbänö wede pönëminii, ante tömämæ quëwënäni tededäni eñënanipa. Ìninque botö iñömö Itota Codito emöwo apænedinque Wængonguï ingante waa ate apænebopa. Wængonguï bitö adobique pönö cæbi ate odömänoidi wede pönënanipa, ante apænebopa. ⁹ Wængonguï Wengä ingantedö ante watapæ apænedinque botö Wængonguï ingante në cædömo inte tömengä nänö änö ante ædæmö ewocadinque apænebo eñënanipa. Botö mänömaï cæbopa, ante në adingä inte Wængonguï iñömö edæ, Odömänoidi beyæ ante Pabodo botö imote woyowotæ incæ itæde incæ apænecampa, ante në eñengä ingampa. ¹⁰ Edæ, Wængonguï, bitö Ao ämi ate botö ñöwo odömänoidi

weca ēñacæ gobaiṃmopa, ante Wængongui ingante mīnitō beyæ ante botō cōwē apænebopa.

¹¹ Wængongui Ōnōwoca beyæ apænebo ēñēninque mīnitō tæi piñænte ewocacæmīnīmpa, ante cæcæte ante botō mīnitō weca ēñacæboīmpa, ante wæbopa. ¹² Edæ mīnitō botō wede pōnēnō beyæ wampo pōnente bayōmīni botō wæætē, Mīnitō wede pōnēmīnīpa, ante adīnque adobaī wampo pōnēmo īnīnque mōnō pōnencabo godongāmæ wampo pōnēninque godōmenque tæi piñænte entawengæīmpa, ante pōnēninque botō mīnitō īmīnite aīnente wæbopa.

¹³ Botō wabæca quēwēnāni weca gote apænebo ēñēninque pancadāniya wede pōnēnāni badānitapa. Īnīnque, Botō mīnitō weca gote apæneyōmo wadāni pancadāniya adobaī wede pōnencædānīmpa, ante cædīnque botō æpogamē incæ poncæ cæyōmo edæ wææ cæte intapa. Īnīnque botō, Tæmpo poncæ cætabopa, ante yewæmōmo ate ēñencæmīnīmpa, ante yewæmōmopa. ¹⁴ Edæ guidiegoidi incæ wadāni incæ, ocai encadāni incæ ocai omæcadāni incæ ædānimē iñōnānite botō debe intē bai edæ tōmānāni īnānite odōmonte apænequēnēmo īnōmo īmopa. ¹⁵ Mānōmaī beyæ mīnitō Odōmā iñōmō quēwēmīni iñōmīnite botō mīnitō īmīnite adobaī mōnō Codito ingantedō ante watapæ apænecæte ante nanguī cæīnente wæbopa.

Mōnō tæi piñænte ewocadō Codito beyænque impa, ante

¹⁶ Mōnitō oodeomōni iñōmōnite tāno apænedīnque Wængongui iñōmō mīnitō oodeoidi īnāmaī iñōmīnite ayæ adobaī apænedīnque, Mīnitō wede pōnēmīni adīnque Codito waa

pöni pönö ængä beyænque quëwencæminimpa, ante tæi piñænte cægacäimpa. Ìninqe mäninö Codito ingantedö ante botö iñömö watapæ apænedinque, Wængongui tæi piñænte nänö cægainö impa, ante pönente wædinque edæ guiñenedämaï inte do apænebopa. ¹⁷ Mönö wede pönemö iñömönte Wængongui mänine ante odömönte watapæ apæneca beyænque mönö nö cæte quëwemö bagamöimpa. Mänine beyænque godömenque wede pönente badinque mönö wede pönenö beyænque quëwemompa. Ìninqe docä iñömö Wængongui beyæ yewæmöninque, “Në nö cæte quëwëngä incæ tömengä nänö wede pönenö beyænque quëwencæcäimpa,” ante nänö yewæmongainö bai edæ do batimpa.

Mönö waocabo wentamö mongænte wæmompä, ante

¹⁸ Në wiwa cædäni guiquënë wiwa nani cædö beyænque wadäni edæ Wængongui nö pöni nänö apænegainö ante ædö cæte ëñenguinänii. Ìninqe Wængongui ingante në wiwa cædäni nani ëñenämaï ininö ante godö piininqe tömengä öönädë ongöninque wiwa nani cædinö beyænque do pangä wædäni edonque amompa. ¹⁹ Wængongui, Botö æbodö imoo, ante tömämini edonque pöni ëñencæminimpa, ante cædinque tömämö imönte odömöninque tömënanï inänite adobaï edonque pöni odömongä wægadänimpa. ²⁰ Wëenëñedë pöni në quëwengainäni tönö ñöwo ganca quëwemö adobaï, Wængongui mönö në adämaï inongä inte æbänö quëwengäa, ante ëñencæte ante wægaimö inömö inte mönö tömengä nänö badongaincooque

adique edæ edonque pönī acæimpa. Edæ, Tömengä ñimpo cädämaï inte cöwē nē tæi piñænongä ingampa, ante ayæ, Nē Wængonguï ñongä ingampa, ante wædique mönō waocabo edonque aquenēmō imompa. Ìñæmpa eñenāmaï intabopa, ante ædö cæte anguii.

²¹ Wængonguï ingante do ate bai ingaināni incæte waodāni tömengä ingante edæ, Bitō Wængonguï ñäo emönōmi imipa, ante edæ änāmaï ñönānimpa. Wængonguï ingante waa ate pönente apænedāmaï ñönānimpa. Mänōmaï ocai omæcadāni bai mīmō omædenāni bai badinque tömēnāni wentamō entawēnāni bagadānimpa.

²² Ocai encamōni imönipa, ante änāni incæte tömēnāni wæætē mänōmaï cædique ocai omæcadāni bagadānimpa. ²³ Edæ Wængonguï wænāmaï nē Quëwengaingä ñongante tömēnāni wæætē godō Baa angadānimpa. Tömengä nänō ñäo emönō ante piinte cædique tömēnāni wæætē waomō nē wæwocamō mönō emönō bai badöninque, öömä eñadāni nāni emönō bai badöninque, ocaguï eñadāni nāni emönō bai badöninque, ocaguï ömaadāni nāni emönō bai badöninque tömēnāni, Mönitō wængonguï ingampa, ante cædönānimpa.

²⁴ Mänōmaï cädāni ate wædique Wængonguï, Minitō mīni cæinente wädō ante ee abo cæcæminimpa, ante da godongä wadæ godinque tömēnāni baonga nāni ñömæi mongænte quëwenguinque cædönānimpa. Ìniquē nāna gæncaya nāna gæncaya nāni monguēnēnō ante Baa ante guïñeñadāmaï inte cædique wacā ingä wacā ingä godō wiwa cædönānimpa. ²⁵ Wængonguï näwangä

pöni nänö apænegaïnö ante tömënäni Baa äninque mä pönëninque nãni babæ apænegaïnonque ante Ao änönänimpa. Mänömaï cædönäni inte tömënäni wæætë Wængonguï nänö nê badongaincoo weca ædæ wææninique, Mönitö wængonguï impa, ante cædinqe nê Badongaingä ingante edæ ëmö cæte wadæ gogadänimpa. Incæte tömengä nê Badongaingä ïñongante mönö waocabo inguipoga mönö quëwëñedë ayæ ate miinguiipo bayonte wantæpiyæ mönö quëwëñedë Wængonguï ingante, Bitö tömëmi toquinque pönö waa cæbi æmönipa, ante mönö apænecæimpa. Mänömaï impa, ante Amëë, ämopa.

²⁶ Mänömaï cæyönänite Wængonguï, Minitö guïñëñadämaï mini toïnente wædonque gobæwedäni, ante da godongä gogadänimpa. Ìninque onquiyænäni incæ, Nê onquiyæmo ïnömo inte botö onguïñængä tönö monguënëmo ïmopa, ante änämaï ïnäni inte godö wacä onquiyængä tönö towente möwënönänimpa. ²⁷ Ayæ onguïñænäni incæ adobaï cædinqe, Botö onguïñæmo ïnömo inte onquiyængä tönö monguënëmo ïmopa, änämaï ïnäni inte godö wacä onguïñængä tönö möïnente gonga bæco baï toïnente wædäni bagadänimpa. Ìninque cöwë nãni waa quëwenguënënö ante Baa äninque nãni onguïñæncabo ïnönäni inte wïwa cædönänimpa. Mänömaï cæyönänite Wængonguï eyepæ pöni godö pangä wædinqe tömënäni wïwa nãni cædö beyænque nãmä baonga caate wæwengadänimpa.

²⁸ Wængonguï ingante mönö pönente ëñengæimpa, ante tömënäni, Önonquedö ante

impa, ante tedeyönänite Wængongui wæætë, Ocaidë wentamö encadömini inte edæ waomini mini wii cæquënënö incæ ee abo cæbæwedäni, ante da godongä gogadänimpa.

²⁹ Tömänäni iñömö nö cæquinämaï inäni inte do wiwa cädänique badinque iïmaï cädänipa. Wacä ingä godö towëninque tömänäni wadäni inänite në wënæ wënæ cädänique inänipa. Mäincoo ante æinente wæwänäni inte tömänäni, Wacä gomonga ængä ingante godö piinte adänipa. Ayæ edæ, Mönö godö wængongæimpa, ante cædinque do cädänipa. Guëadö guëa piinte cädänipa. Wacä oda cæcæcäimpa, ante ancaa cædinque tömänäni godö babæ cädänipa. Ayæ në wiwa pönëwänäni inte tömänäni, Wadäni wæcädänimpa, ante godö piinte cädänipa. Godö wæntaa godö wæntaa tedewänäni inänipa. ³⁰ Ayæ wadäni inänite piïninque iïnäni iñömö godö babæ ante tedewänäni inänipa. Wængongui ingante piinte cädäni inänipa. Ayæ, Tömëmoque waëmö imopa, ante nämä ængö cæte bai cædinque wadäni inänite wææntodonte bai äninque, Önonquedö cæcantedö abii, ante godö piinte todäni inänipa. Edæ, Æbänö godömenque wënæ wënæ cæte toquimoo, ante edæ pönëë cöninque edæ nanguï cädänipa. Mæmpocä tönö badä, Cæedäni, äñönate tömänäni eñenämaï cädänipa. ³¹ Mïmö ömædänäni inte tömänäni ocai ömæcadäni bagadänimpa. Cæcæboimpa, äninque edæ iinque cädämaï inönänimpa. Wacä caate wæcä adinque godö waadedämaï inönäni inte tömänäni edæ godömenque piïnäni inte cädönänimpa.

³² Mänömaï cädäni iñömö näni wænguinque cädänipa, ante Wængongui nö pönï nänö angainö

ante tömënäni önömoncaque në eññänäni inte tömënäni näni wënæ wënæ cæinënouque ante cædänipa. Ayæ tömënäni wiwa näni cædö bai wadäni adobaï cædäni adinque tömënäni, Waa cæminipa, äninque në cædäni inänite waa adänipa.

2

Nöingä ante Wængonguï apænte angampa, ante

¹ Tömënäni mänömaï cædänipa. Incæte bitö adobaï wiwa cædömi inte tömëmi pante wæquinque tömënäni inänite apænte ämipa. Ìninque bitö wacä ingante, Bitö pante wæquinque wiwa cæbipa, ante apænte ämi inte bitö inæmpa adobaï wiwa cædömi inte edæ æbänö cæte nämä ante wææ anguïmii. ² Wiwa cædäni inänite apænte äninque Wængonguï cöwë nöingä ante apænte angampa, ante edæ do eññemompa. ³ Ìninque waobi önömique inömi inte bitö inæmpa tömënäni inänite apænte ämi incæte tömënäni näni cædö bai adobaï cædömi inte edæ, Wængonguï botö imote pänämaï inte ata cæpocæcäimpa, ante pönëmitawo. ⁴ Bitö wiwa cæbi inte Ca ca wæquënëmi inömite Wængonguï wæætë ee pänämaï inte nanguï waadete pönö cæyongante bitö wæætë edæ piïninque Baa ämitawo. Ìnæmpa tömengä, Bitö, Æmæwo wënæ wënæ cætabopa, ante wædinque botö gämænö poncæbiimpa, ante Wængonguï pönö waadete cæcampa, ante pönëmiyaa.

⁵ Incæte bitö mimö ömædëmi inte ancaa Baa äninque edæ wënæ wënæ bitö cædö ante ñimpo cædämaï inömite Wængonguï nänö ænguï baquiönæ iinque bayonte tömengä ænguï pönï badinque

godömenque pangä wæcæbiimpa. Tömengä æbänö nō apænte angää, ante mǎniñedē ate edæ edonque acæimpa. ⁶ Edæ, Tömämö mönō cægaī ganca ante Wængonguī eyepæ pōni pædæ pōnongä æncæmöimpa, ante dodāni nāni yewæmongainō bai edæ iinque bacæimpa.

⁷ İinque, Mönō ñäö bai entawengæimpa, ante cædinque ayæ, Wængonguī mönō imonte waa adinque pōnō cæcä ate mönō wæwocadāmaī ewocacæimpa, ante cædinque mönō wæntædāmaī inte ee waa cæte quëwëmö İinque Wængonguī pōnō cæcä ate mönō cōwë wænāmaī quëwëmaïmompä. ⁸ Wæætë, Wængonguī nāwangä nānō apænedö ante Baa äinque, Tömëmo beyænque quëwencæboimpa, ante nē änäni İänite ayæ wadāni wīwa nāni cæquīnonque ante nē tee empote godāni İänite Wængonguī ænguī badinque godö pīinte cæcæcäimpa. ⁹ Edæ mönō waocabo wënæ wënæ cæmö adinque Wængonguī oodeomöni İñömönite täno pāninque oodeomīni İnämaī İmīni İmīnite adobaī pāñongä nē wënæ wënæ cæmö tömämö İñömö edæ caate wæwencæmöimpa. ¹⁰ Wæætë waa cæmö adinque Wængonguī oodeomöni İmönite täno pōnō waadete cædinque oodeomīni İnämaī İmīni İmīnite adobaī pōnō waadete cæyongä nē waa cæmö wæætë gänë entawëinque ñäö apāite bai entawëñömonte edæ Wængonguī tömämö imonte waa acæcäimpa.

¹¹ Edæ mönitö oodeomöni İmöni incæ mīnitö oodeomīni İnämaī İmīni incæ Wængonguī tömämö imonte adoyömö pōni adinque wadö wadö ate pönente cædāmaī ingampa. ¹² Möitee wodi, İmaī cæedāni, ante nānō wææ angainō ante

ömæmoncadäni inte wīwa cædäni ĩninqe tōmengä nänö wææ angainö dæ ante bai mänināni wæncædānimpā. Wæætē Möitee wodi nänö wææ angainö ante do ēñente ēmoncadīnāni incæte wīwa cædäni adinqe Wængonguī mänine ante ēñenāmaī cædäni beyænque apænte āninqe pangä wæcædānimpā. ¹³ Edæ Möitee wodi nänö wææ angainö ante önömoncaque ēñenāni inte tōmēnāni nāni önömoncaque ēñenö beyænque Wængonguī ayongä dicæ nö cædäni badāniyaa.

Wæætē edæ mänine ante ēñente cædäni ĩnānite guiquēnē Wængonguī pönö angä ate tōmēnāni ĩñömö nö cædäni bacædānimpā. ¹⁴ Edæ Möitee wodi nänö wææ angainö ante ömæmoncadäni inte oodeoidi ĩnāmaī ĩnāni incæ pancadāniya tōmēnāni dodāni nāni wææ angainonque ante Ao ante cædinque Wængonguī nänö wææ angainö bai edæ do cædānipā. Mänōmaī ēñente bai cædinque tōmēnāni mīmō entawēnāni inte mänine ante ömæmoncadäni ĩnāni incæte nāmā nāni wææ ānonque ēñente cædānipā. ¹⁵ Edæ, Tōmēnāni dodāni nāni wææ angainö ēñeninqe waa cædäni inte tōmēnāni Wængonguī nänö wææ angainö bai do entawēnānipā, ante edonque acæimpā. Mīmō entawēnāni inte tōmēnāni nāni caboque godongāmæ pönēninqe wēnæ wēnæ nāni cædönö ante nāēmæ apænte wææ ānānipā. Ayæ wæætē waa cædäni ate tōmēnāni nāēmæ apænte ñimpo cædānipā.

¹⁶ Codito ingantedö ante watapæ ēñengaīmo inte botö ĩmaī ante apænebopā. Wængonguī angä ēñente cædinque Itota Codito wæætē waomö mönö awēmō entawēnō ante edonque pōni ad-

inque apænte ancæcäimpa. Tömengä nänö apænte angüönæ iinque bayedē edæ mäninö ante botö yewæmonte apænedö bai edæ iinque bacæimpa.

Möitee nänö wææ angainta adinque oodeoidi wii eññänäni

¹⁷ Bitö iñömö edæ, Oodeobo inömo imopa, ante ämipa. Ayæ, Möitee wodi nänö wææ angainta nē eññemo inte botö Wængongui ayongante waa quëwëmo imopa, ante edæ nämä ængö cædinque ämipa. ¹⁸ Wængongui æbänö angää, ante do eññemipa. Ayæ tömengä nänö wææ angainö ante do eññemi inte bitö, Quinö waa i, ante do eññenique Ao ante æmipa. ¹⁹ Bitö, Wadäni babetamö bai ewocayönänite botö töö æmænte mäobo godänipa. Wëmö iñömö quëwente bai adämaï iñönänite botö iñömö, Acæminimpa, ante tica ënente bai odömonte apænebopa, ante edæ, Näwangä ämopa, ante bitö apænebitawo. ²⁰ Ayæ adobai, Mönö Möitee wodi nänö wææ angainö ante eññente beyænque mönö eññenguënönö ante entawëninque mönö nö cæquënönö ante adobai tömänö ante entawengæimpa, ante bitö pönëmitawo. Ayæ mänömainö ante bitö pönönö beyæ bitö, Nē oda cædäni inänite botö nē töingä odömömo imopa, ante pönëmitawo. Wëññänäni bai wædænque eññänäni iñönänite botö nē odömonte apænebo imopa, ante pönëmitawo.

²¹ Iñæmpa mänömaï inömi inte bitö edæ dicæ nämä odömonte apænete eññemitawogaa. Wadäni inänite odömonte apænedinque, Awëmö ænämaï iedäni, ante odömonte apænedömi inte tömëmi awëmö æmitawo. ²² Bitö wadäni inänite odömonte

apænedinque, Nänöogængä inämaï iñongante godö guëa mönämaï ië, ante nê wææ ämi inte bitö adobaï wacä tönö guëa mömitawoo. Ayæ, Wængongui ingampa, ante nani badöinca ante nê pïimi inte bitö edæ tömënäni nani apæneincönë go guid- inque edæ ö æmitawoo. ²³ Iñæmpa bitö, Möitee wodi nänö wææ angainö ante botö ëñente cæbo imopa, ante tededinque nämä ængö cædömi inte edæ mänine ante ëñënämaï cæbi adinque wadäni wæætë Wængongui ingante waa adämaï inänipa töö. ²⁴ Edæ, “Minitö cædinö beyæ oodeoidi inämaï inäni incæ Wængongui ëmöwo ante godö babæ ante wënæ wënæ änewënänipa,” ante tömengä beyæ dodäni nani yewæmongainö baï do batimpa.

²⁵ Edæ Wængongui nänö wææ angainö ante ëñente cæbi ininque bitö, Näwä oodeobo imopa, ante nê ëö togæïmi badinque waa imaimpa. Wæætë edæ ëñënämaï cæbi ininque oodeo inämaï ingä bagäacä ingä baï bitö iñömö edæ do babaïmipa. ²⁶ Oodeoidi inämaï inäni guiquënë bagäadäni inäni incæte tömënäni Wængongui nänö wææ angainö ante ëñente cædäni ininque Wængongui ayongä tömënäni do ëö togæïnäni baï inönäni inte oodeoidi baï inänipa. ²⁷ Bitö iñömö Möitee wodi nänö wææ yewæmongainta mänimi inte nê ëö togæïmi imitawo. Bitö mänömaï imi incæte ëñënämaï cæbi iñömi wacä wæætë bagäacä inongä inte ëñente cæcä ininque tömengä ëñente nänö cædö beyænque Wængongui wæætë bitö imite apænte äninque pancæcäimpa.

²⁸ Iñæmpa oodeo ëñagaingä inte baö beyænque oodeocä ingä incæte tömengä wii mänömaï ingä

beyænque näwä oodeocä ingampa. Adobaï nē
 eö togæingä iñömö baonque nänö eö togæinö
 beyænque tömengä Wængonguï ayongä ædæmö
 eö togæingä bai wii ingampa. ²⁹ Wængonguï
 Önöwoca ingante nē ewocacä guiquënë tömengä
 iñömö edæ näwä oodeo bai badinque Wængonguï
 wēñængä ingampa. Edæ Möitee wodi nänö wææ
 yewæmongainö ante eñente eö togæinique
 waocä tömengä wentamö nänö entawënö dicæ
 wido cæquiringä. Wængonguï Önöwoca guiquënë
 pönö wido cæcä beyænque waocä wæætē waëmö
 entawengampa. Mänömaï entawengä ingante
 wadäni waa adämaï inäni incæte Wængonguï
 wæætē, Bitö waa entawëmi abopa, äinique
 tömengä ingante waa apænecampa.

3

¹ İinique oodeocä iñömö edæ, Oodeobo imopa,
 ante toquënegä ingantawo. Ayæ adobaï, Botö
 eö togæimo imopa, ante toquënegä ingantawo.
² Ao ämopa. Nē oodeoidi inönäni inte tömënäni
 cöwë nanguï toquënenäni inänipa. Edæ Wængonguï
 apænecä eñengainäni inte edæ oodeoidi tömengä
 nänö apænedö ante nē mangainäni inte nē to-
 quënenäni inänipa. ³ Mänömaï i incæte pancadäniya
 iñömö edæ wede pönënämaï inänipa. İinique mönö
 æbänö anguii. Tömënäni nani pönënämaï inö
 beyænque Wængonguï tömënäni inänite dicæ ñimpo
 cædinque ædæmö aadämaï ingantawogaa. ⁴ Ædö
 cæte mänömaï inguii. Mönö waocabo tömämö nē
 babæ apænemö iñömonte Wængonguï iñömö nö

pöni cæcä ingainö anguënë. Edæ tömengä beyæ iimaï ante yewæmongatimpa.

“Wængonguï bitö æbänö apænebii, ante apænte ancæ cædäni incæte tömënäni, Wængonguï nö pöni ante apænecampa, ante edonque acædänimpa.

Bitö nē tæi emömi inte edæ bitö imite nē apænte ancæ cædäni inänite näëmæ edæ wææntodonte bai cædinque edæ gänä cæcæbiimpa.”

Ante näni yewæmongainö bai edæ bacæimpa.

⁵ Waodäni mä pönëninque iimaï ante tedewënänipa. Mönitö wiwa cæyömönite Wængonguï nö cæcä adinque wadäni, Wængonguinque nē nö cædongä ingampa, ante godömenque edonque acædänimpa. Ininque wiwa cæyömönite Wængonguï quïnante piinte pangäa, ante tedewënänipa. Mänömaï tedewënäni adinque mönö wæætë æbänö anguënëmö imöö. Inæmpa waodänique näni änewënö bai dicæ anguënëmö imongaa. ⁶Ædö cæte mänömaï änewenguïi. Mäninö näni tedewënö näwangä i bai inguipoga quëwëmö imonte Wængonguï apænte änämaï inguënengä.

⁷ Wadäni guiquënë iimaï ante tedewënänipa. Wængonguï cöwë näwangä ante apæneyongante botö babæ apænebo adinque wadäni, Wængonguinque näwangä ante apænecampa, ante tömengä ingante godömenque waa acædänimpa. Ininque babæ botö apænedö beyænque Wængonguï godömenque ñäö apäite bai emongä ingampa. Ininque, Bitö nē wënæ wënæ cæbi imipa, ante Wængonguï quïnante botö imote apænte angäa,

ante tedewänänpa. ⁸ Tömänäni, Wængongui ingante godömenque waa acädänimpa, ante mönö godömenque wänæ wänæ cæcæimpa, ante tedewänänpa. Tömänäni nāni tedewänö nāwangä i bai mönitö adobai ante ancädömönimpa. Edæ, Tömänäni nāni tedewänö bai edæ Pabodoidi adobai ante apænedänipa, ante pancadāniya pönö wänæ wänæ ante babæ apænedänipa. Mänömai ante nē apænewänäni inänite pāninque Wængongui nö cæte pangampa.

Tömämö mönö pante wæquinque wentamö mongæmompā

⁹ Ininque æbänö ante anguii. Minitö oodeoidi ināmai önöminique iñöminite mönitö möni oodeocabo dicæ godömenque waa pönī imöniyaa. Iñæmpa mönitö oodeomöni incæ minitö oodeomöni ināmai imini incæ tömämö nē wänæ wänæ cädömö imompā, ante do odömönte yewæmömöni abaiminipa. ¹⁰ Edæ iūmai ante Wængongui beyæ ante ämotamini ante bai yewæmongatimpa. “Nē nö cædongä iñömö edæ dæ angampa.

Adocanque incæ edæ dæ angampa.

¹¹ Nē eñente pönengä iñömö edæ dæ angampa.

Wængongui ingante ante nē diqui diqui minongä iñömö edæ dæ angampa.

¹² Tömänäni edæ oda cæte wapiticæ godinque,

nāni waa cädāmai incaboque badānitapa.

Nē waa cædongä iñömö edæ dæ angampa.

Adocanque incæ edæ dæ angampa.

¹³ Waodāni inänite wænoncæte ante ææ ænete bai emencadinque,

tömänäni babæ ante enguënëwate tedewänänpa.

Edæ tæntæ tømëmæ ãnete baï, Wæñongæïmpa,
ante ënedänipa.

14 Tømënäni piïnte näni tedewënö beyænque mon-
capæ ti nä baï enguënëwadänipa.

15 Tømënäni wæñonguïwaque pogodo goquïwaque
ëwadänipa.

16 Tømënäni në godö wænönäni inte mäincoo wido
cæte wodii godäni ate edæ mü quëwënäni
ponte adinque caate baï wæwënänipa.

17 Në piïnte cædönäni inte tømënäni Wængonguï
taadö tømengä gänë entawente nänö godönö
ante adämaï inte cædänipa.

18 Tømënäni, Wængonguï ingante mönö guïñente
ëñengæïmpa, ante pönënämaï inänipa.”
Ante dodäni näni yewæmongainö baï impa.

19 Æcänö Möïtee wodi nänö wææ angainö ante
në ëñente quëwenguënëna inaa tømengä beyænque
ante wææ yewæmongatimpa. Mänömaï i beyæ,
Botö eyepæ cæbo imopa, ante mönö ædö cæte an-
guï. Edæ guïñënete mönö pæ wëenecæïmpa. Ayæ
inguipoga tømäo quëwëmö tømämö Wængonguï
në apænte angä weca ongöñinque edæ, Æbänö
cætaboo, ante Wængonguï ingante mönö edonque
apænequënëmö imopa. Mänömainö ante edæ do
ëñëmopa. 20 Mänömaï beyæ Wængonguï, Möïtee
wodi nänö wææ angainö ædæmö ëñente cæbi
beyæ bitö botö ayömo në nö cæbi babipa, ante ado-
canque ingante edæ änämaï incæcäïmpa. Wæætë
mänine nänö wææ angainö ëñente beyæ mönö,
Në wënæ wënæ cæmö imopa, ante edonque
amopa.

Mönö wede pönönö beyænque nö cæte quëwëmompä, ante

²¹ Wïi Möitee wodi nänö wææ angainö ante ëñëmini beyæ wæætë edæ Wængongui incæ pönö badongä beyænque mönö tömengä ayongä nö cæmö bamompä, ante ñowo pönï odömongatimpä. Dodäni Möitee wodi tönö Wængongui beyæ në apænegainäni iñömö, Ìncayæ ate mänömaï bacäïmpä, ante do yewæmongadänimpä.

²² Wængongui pönö badongä ate mönö në wede pönëmö iñömö Itota Codito ingante mönö wede pönönö beyænque edæ tömämö tömengä ayongä nö cæmö bamompä. Edæ mönö adoyömö ingaimö inte önömonque imompä. ²³ Ìninqe mönö tömämö wënæ wënæ cæmö inte Wængongui nänö ñäö bai quëwëñömö guicæte ante cædinque wïi eyepæ cæmö inte wïi guimompä. ²⁴ Incæte Itota Codito ængä beyænque abæ tawænte gote bai quëwëmö iñömonte Wængongui önonque änämaï inte waadete pönö badongä ate mönö tömengä ayongä nö cæmö bamompä. ²⁵ Wængongui iñömö Itota Codito ingante da pönöninque, Tömengä mïnitö wënæ wënæ cædö ante teëmente wængä beyænque botö wæætë piyænë cædinque mïnitö imïnite pänämaï incæboimpä, ante cægacäïmpä. Ìninqe tömengä, Mänömaï pönö cæbo ate mïnitö, Itota wepæ mönö beyæ pe tæ pe tæ wæænimpä, ante wede pönëninque wede mïni pönönö beyænque quëwencæmïnimpä, ante pönö cægacäïmpä.

Mänömaï cædinque Wængongui wëenëñedë mönö waocabo mönö wënæ wënæ cægainö ante ee adinque në pänämaï ingaingä incæte edæ, Botö

cōwē nōingā ante apænte änōmo ïmopa, ante ēñencæmīnīmpa, ante odōmongacāīmpa. ²⁶ Ìnīnque, Wængonguī nē nō cæcā ïnongā ingampa, ante mōnō acæīmpa. Ayæ adobaī, Itota ingante nē pōnēmō ïñōmonte Wængonguī nē panguēnengā ingā incæ mōnō ïmonte ata cæpodīnque pōnō badongā ate mōnō wæætē tōmengā ayongā edæ nē nō cæmō bamompa, ante mōnō acæīmpa. Ìnīnque tōmengā mănōmaī cædīnque tōmengā nō nānō cædō ante odōmoncæte ante ñōwo cægacāīmpa.

²⁷ Ìnīnque mōnō waocabo ïñōmō nāmā ængō cæte baī cædīnque mōnō, Nāmā cædīnque nō cæmō bamompa, ante ædō cæte anguīmōō. Ìñæmpa mănōmaī ānīnque cædāmaī ingæīmpa. Quīnante nāmā wīī ængō cæquīī, ante wæmīnitawo. Mōitee wodi nānō wææ angāinō ædæmō ēñente cæmō inte baī mōnō, Tōmēmō cætamompa, ancædōmōīmpa. Incæte ædæmō ēñente dicæ cæmongaa. Wæætē tōmengā ingante wede mōnō pōnēnō beyænque tōmengā ayongā nō cædōmō bamompa, ante adīnque mōnō, Tōmēmō cætamompa, ante ædō cæte anguīī. ²⁸ Ìñæmpa waocā Wængonguī nānō wææ angāinō ante ēñente cæcā incæ wīī tōmengā nānō ēñente cædō beyæ nē nō cæcā bacampa. Wæætē wede nānō pōnēnō beyænque Wængonguī ayongā edæ nē nō cæcā bacampa, ante do edæ apænebo ēñēmaīmīnīpa.

²⁹ Oodeomōni ïñōmōnite Wængonguī mōnitō Wængonguī ïnongā ingampa. Oodeomīni ïnāmā ïmīni guīquēnē, Wīī mōnitō Wængonguī ingampa, ante pōnēmīnitawo. Ìñæmpa oodeomīni ïnāmā ïñōmīnite adocā Wængonguī mīnitō Wængonguī

ingampa. ³⁰ Edæ adocanque Wængongui inongä ingampa. İninqe në eö togæimöni imöni möni wede pönönö beyænque tömengä pönö badongä ate tömengä ayongä edæ nö cæmöni bamönipa. Adobaï bagäamini mini wede pönönö beyænque Wængongui adocanque inongä inte pönö badongä ate minitö adobaï tömengä ayongä nö cæmini baminipa. ³¹ Mönö pönönö beyænque impa, ante apænedinque mönitö Wængongui nänö wææ angainö ante dicæ wëä godonte bai cæmöniyaa. Wii mänömaï cæmönipa. Wæætë mänömainö ante apænedinque tömengä nänö wææ angainö ante Ao äninque mönitö, Eñeedäni, ante odömonte apænemönipa.

4

Abadäo wodi æbänö cægacäi, ante pönengæimpa

¹ Mäninö ante mönitö mæmæ Abadäo wodi inömo æbänö ante eñengacäi, ante mönö ñowo pönente apænecæimpa. ² Abadäo wodi në eñente cæcä ingaingä incæte tömengä nänö eñente cädö beyænque dicæ nö pönö entawengä bacantawogaa. Mänömaï cædinque nö cæcä bagacäimpa, ante näwangä i bai tömengä woadäni eñeñönänite, Waa cæbo imopa, ante do ancægacäimpa. Incæte tömengä Wængongui eñeñongante mäninö ante cöwë änämaï inguënengä ingacäimpa. ³ Wængongui æbänö ante apænecä eñente yewæmongadäni, ante amini. Edæ iimaï ante apænecä eñente yewæmongadänimpa. “Wængongui nöingä ante apænecampa, ante Abadäo wede pönengacäimpa. İninqe tömengä

wede nänö pönönö beyænque Wængonguï wæætë edæ, Botö ayömo Abadäo nē nō entawengä ingä abopa, angacäimpa,” ante yewæmongadänimpa.

⁴ Edæ wadäni beyæ waocä nanguï cæcä ate tömënäni debe badinäni inte edæ, Önonque pönömöni æe, ante ædö cæte anguinäni. Ìñæmpa wii önonque godonte impa. Wæætë tömengä nänö nanguï cædinö beyænque paga ante nē godonguënänäni inte awënëidi, Bitö nanguï cæbitapa, ante godönäni ængampa. ⁵ Wængonguï guiquënë önonque pönö cæcä æmöimpa. Waocä wiwa cæcä incæ wede pönengä adinque Wængonguï pönö badongä ate tömengä Wængonguï ayongante wæætë nō cæcä bacampa. Ìninqe waocä waa cädämaï incæ edæ wede pönengä adinque Wængonguï wæætë tömengä ingante pönö badöninque, Nö pönï bitö entawenguinque bitö wede pönëmi abopa, angampa. ⁶ Waocä waa cädämaï ïñongante Wængonguï pönö badongä ate tömengä Wængonguï ayongä nō pönï entawengä ïninqe tömengä watapæ quëwencæcäimpa, ante apænedinque Dabii wodi adobaï ämotamini ante bai yewæmongacäimpa.

⁷ Adocä yewæmöninque,

“Wadäni ëñänämaï cädäni inänite Wængonguï pönö ñimpo cæcä ate

tömënäni wæætë watapæ quëwencädänimpa.

Edæ tömënäni ëñänämaï nänï cädö ante ö ænte mào tee moncate bai cæcä adinque nanguï tocädänimpa.

⁸ Ecänö ingante Wængonguï, Bitö pante wæquinque wënæ wënæ cæbipa, ante cöwë püinte änämaï

ingä ïninqe mäningä waocä wæætē nangui
tocæcäimpa.”

⁹ Ante Awënë Dabii wodi, Eö togæninänique
tocædänimpa, ante dicæ yewæmongantawogaa.
Bagäadäni adobaï tocædänimpa, ante ancæte ante
yewæmongacäimpa. Abadäo wodi Wængongui
ingante wede nänö pönönö beyænque Wængongui,
Botö ayömo Abadäo nē nō entawengä ingä
abopa, angacäimpa. Mänömainö ante edæ botö
do yewæmömo abaiminipa. ¹⁰ Abadäo wodi æbänö
engæñongante Wængongui mänömaï angacäi.
Dicæ eö togæningä ïñongante angantawogaa.
Wæætē bagäacä ïñongante angacäimpa. ¹¹ ïninqe,
Abadäo bagäacä inte wede pönengä beyænque
botö pönö badömo ate nō cæcä bacampa, ante
ëñencædänimpa, ante cædinque Wængongui angä
eö togænte bagacäimpa.

Mänömaï cæcä beyæ minitö bagäamini inte
wede pönemini ïñömini Abadäo wodi minitö
wæmængä bai bagacäimpa. Abadäo wodi pæimini
bai wede pönemini adinque Wængongui adobaï,
Nö entawemini bamini acæboimpa, ante pönö
badongacäimpa. ¹² Mönitö wæmæ Abadäo
wodi doyedē bagäacä ingäñedē incæ wede
pönengä ingacäimpa. Möni idægocabo ïñömö nē eö
togæimöni inte edæ tömengä wede pönente nänö
cægongainö adodö tee empote gomönipa. ïninqe
mäninönö möni wede pönente godönö gomöni
beyænque möni eö togæncabo wæmængä adocä
Abadäo wodi ingacäimpa.

*Mönö wede pönönö beyænque Wængongui nänö
angainö ante cæcampa, ante*

¹³ Wængonguï, Inguipoga incæ bitö nē ænguïmi incæbiimpa, äninque Abadäo wodi tönö tömengä nänömoidi inänite pönö angä ængadänimpa. Mänömainö äninque Wængonguï dicæ, Botö wææ angainö ante eñente cädäniq̄ue æncædänimpa, ante angantawogaa. Wæætē edæ wede pönente tömengä ayongä nö entawänäni badäni beyænque Wængonguï, Inguipoga incæ pönömo æncæminimpa, ante apænegacäimpa. ¹⁴ Wængonguï dicæ, Botö wææ angainö eñente nē cädäniq̄ue nē ænguïnäni inänipa, ante angantawogaa. Edæ mänömainö angä bai mönö wede pönönö ante önonque pönencædömöimpa. Tömengä nänö angainö incæ wo ewente bai bacædönimpa. ¹⁵ Edæ mäninö tömengä nänö wææ angainö ante eñenämaï cädäni beyænque Wængonguï ænguï badinque pangampa. Wæætē wææ änämaï inte bai Wængonguï, Botö wææ angainö ante eñenämaï cæbipa, ante ædö cæte anguingäa. Edæ dæ ancædönimpa.

¹⁶ Mänömaï beyæ Wængonguï, Botö waadete pönö cædö beyænque æminipa, ante edonque acæimpa, ante cædinque Abadäo wodi wede nänö pönönö beyænque ante, Pönömo æncæminimpa, angacäimpa. Mönitö Möitee wodi nänö wææ angainö ante nē eñēmöni iñömönite wii adomönique imönite angacäimpa. Wæætē Abadäo wodi nänö wede pönengai bai adobai wede pönömö iñömönte mönö tömämö imönte Wængonguï, Cöwē pönömo æncæminimpa, angacäimpa. Edæ mönö wede pönencabo iñömönte Abadäo wodi tömämö wæmængä bai ingacäimpa. ¹⁷ Wængonguï edæ do wængainäni inänite pönö

cæcä ate tömënäni iñömö ñäni ömæmonte edæ miinäni quëwënanipa. Dæ angaincoo incæ tömengä do badongä ate edæ a ongoncoopa. Wængonguï mänömaï nē badongä iñongante Abadäo wodi tömengä ingante nē wede pönengä ingacäimpa. Ìninqe Wængonguï, “Abadäo ëñëmi. Botö pönö badömo ate bitö pæinäni yebæninque wacabodäni näni cabo wacabodäni näni cabo nanguï inäni iñönänite edæ bitö adobique tömënäni wæmæmi incæbiimpa.” Ante Wængonguï beyæ ante yewæmongatimpa. Ìninqe Wængonguï ayongante mönö wede pönëmö iñömonte Abadäo wodi mönö wæmængä bagacäimpa.

18 Tömengä ingante, “Bitö pæinäni edæ mänimpodäni bacædänimpa,” ante Wængonguï do angacäimpa. Mänömainö angä ëñëninque, Ædö cæte baquïi, ante wædongä incæ Abadäo wodi, Wængonguï cöwë cæcä beyæ watapæ bacäimpa, ante wede pönengä ingacäimpa. Ìninqe tömengä wede nänö pönënö beyænque “wacabodäni näni cabo wacabodäni näni cabo nanguï inäni bayönänite tömënäni wæmængä” Abadäo bagacäimpa.

19 Tömengä, Botö picængadebo wodo tiëë wadepo quëwengaimo inte edæ botö baö wænte bai ëñabo inte edæ ædö cæte wëñæ tapæiquimoo, ante ëñengacäimpa. Ayæ, Tada adobai wëñæ cöwë mänämaï ingaingä inte picængadecä badingue ædö cæte wëñæ manguingää, ante pönengacäimpa. Incæte mäninö nänö wædö beyænque guñëñadämaï inte Abadäo wodi Wængonguï nänö äninö ante godömenque

pönengacäimpa. ²⁰ Tömengä, Wængonguï wabänö cæbaingää, ante wædämaï inte wæætë Wængonguï nänö, Cöwë pönö cæcæboimpa, äninö ante wede pönengacäimpa. Ayæ, Wængonguï bitö ñäö entawëmi inte tæi ëmonte waa cæcæbiimpa, ante godömenque tæi piñænte entawëninque Abadäö wodi wede pönengacäimpa. ²¹ Edæ, Wængonguï në tæi piñængä inte, Cöwë cæcæboimpa, ante në angaingä inte edæ cöwë cæcæcäimpa, ante Abadäö do ëñëninque edæ wede pönengacäimpa. ²² Tömengä mänömaï wede pönengä beyænque Wængonguï, Abadäö bitö nö entawëmi ïmi abopa, angacäimpa.

²³ Mänine, Bitö nö cæbi ïmi abopa, ante nänö angaine iñömö wii tömengä beyænque yewæmongatimpa. ²⁴ Wæætë mönö beyæ adobaï yewæmongatimpa. Edæ, Mönö Awënë Itota ingante Wængonguï angä ñäni ömæmongacäimpa, ante në angaingä ingante wede pönëmö iñömonte Wængonguï, Botö ayömo minitö nö cæmïni ïmïni abopa, ante badongampa. ²⁵ Wënæ wënæ mönö cädö beyænque mönö Awënë Itota ingante Wængonguï pædæ godongä wængacäimpa. Ayæ mönö beyæ ante cædinque tömengä mönö Awënë Itota ingante, Bitö në nö cädömi inte ñäni ömæmömi beyænque tömënäni botö ayömo nö entawënäni bacædänimpa, ante cædinque angä ñäni ömæmongacäimpa.

5

Wængonguï badongä ate mönö nö cæmö bamompa

1 Mönö wede pönönö beyænque Wængongui pönö badongä ate mönö tömengä ayongante edæ nö cæmö bamompa. İnıne mönö Awënë Itota Codito nänö cægainö beyænque Wængongui piyænë cæcä ate mönö tömengä tönö godongämæ gänë entawente quëwëmompa. 2 Mönö wede pönönö beyæ adocä Codito mönö imonte pönö ænte mämongä ate Wængongui waadete pönö cædinque mönö imonte ængampa. Ayæ Wængongui në ñäö ëmongä weca ongöñömö tömengä pönö badongä ate mönö godongämæ ñäö ëmonte mönö watapæ bacæimpa, ante wede pönëninque tomompa.

3 Ayæ wii mäninque beyæ tomompa. İñæmpa, Waocä nänö wæntædämaï inte ee cæquinque caate wæcampa, ante ëñëmö İnıne mönö caate wæmö incæte caate mönö wædü beyæ adobaï tomompa. 4 Ayæ në wæntædämaï inte ee cæmö adınque mönö Wængongui ayongä në waa cæmö edæ bamompa. Mänömaï bamö İnıne mönö, Watapæ bacæimpa, ante pönente tomompa. 5 Mänömainö ante në pönente tomö İñömö edæ mönö ænguënönö ante do æninque mönö guingo imonte wædämaï imompa. Edæ Wængongui tömengä Tæiyæ Waëmö Önöwoca ingante da pönöninque tömengä nänö waadete pönönö adobaï do pönongä æninque mimönë entawëmompa.

6 Edæ iïmaï impa. Mönö aquiiimö pönı İnömo inte, Ædü cæte cæmöö, ante wæyömonte mönö Codito İñömö eyepæ pönı pönınque, Minitö Wængongui ayongante wiwa cæmini İminıpa, ante adınque wiwa mönö cædü ante teëmente wæætë wængacäimpa. 7 Waocä guiquënë wacä në nö

cædongä ingä adinque tömengä beyæ wæætë dicæ wænguingäa. Incæte, Në waa cædongä wæætë quëwencæcäimpa, ante cædinque adocanque adocanque wabänö Ao ante tömengä beyæ wæætë wæmäinänipa. ⁸ Incæte, Wængongui mīnitō imīnite nangui waadete pönengampa, ante odömoncæte ante cædinque mönō Codito iñömō në wënæ wënæ cæmō iñömōnte mönō beyænque wæætë wængacäimpa. ⁹ Codito wepæ mönō beyæ pe tæ pe tæ wææ beyænque mönō Wængongui ayongante nö entawëmō do batamompa. Codito mönō beyæ mänömai wængaingä inte cōwë godömenque cæcæcäimpa.

Ämo ëñëedäni. Wængongui në püinte panguënegä iñongante adocä Codito gä pe æmpote ængä beyænque Wængongui wæætë mönō imonte edæ ata cæpocä quëwencæmōimpa. ¹⁰ Mönō edæ Wængongui tönō mönō godongämæ piincabo iñömōnte tömengä Wengä mönō beyæ wæætë wængä beyænque mönō Wængongui tönō godongämæ piyænë cæmō bagamōimpa. Mönō Wængongui tönō godongämæ piyænë cæmō ininque tömengä Wengä iñömō cōwë godömenque cæcæcäimpa. Ämo ëñëedäni. Tömengä adocä do wængaingä inte ñäni ömæmonte müingä quëwëninque mönō imonte ængä beyænque mönō wænämai inte cōwë quëwencæmōimpa. ¹¹ Ayæ mönō godömenque iimainō ante ëñengæimpa. Mönō Awënë Itota Codito ængä beyænque Wængongui piyænë cæcä ininque mönō ñöwo Wængongui nempo quëwëninque edæ Itota Codito beyæ ante watapæ tomompa.

Tānocā Adāo wodi bai Codito adobai Tānocā ingampa

¹² Docā mæmæ adocanque tānocā incæ ēñēnāmaī cæcā inique mōnō wēnæ wēnæ cæpāmo inguipoga do pongatimpa. Ayæ tōmengā nānō ēñēnāmaī cægainō beyænque nē wæwocacā bagacāimpa. Tōmengā wēnæ wēnæ cæcā ingaingā bai mōnō tōmāmō adobai nē wēnæ wēnæ cæmō imō inique edæ mōnō waocabo tōmāmō nē wæwocamō edæ do bagamōimpa. ¹³ Edæ wēēnēñedē Mōitee wodi nānō wææ ānāmaī iñedē incæ waodāni do wēnæ wēnæ cædāni ingadānimpa. Wēnæ wēnæ cædāni incæte Wængonguī, Botō wææ ānō ante ēñēnāmaī cæminipa, ante ædō cæte apænte anguingā. Iñæmpa māniñedē ayæ wææ ānāmaī ingacāimpa. ¹⁴ Nē Ponguingā, ante dodāni nāni nē angaingā iñōmō Tānocā nānō ingai bai docā Adāo wodi adobai tānocā ingacāimpa. Incæte Adāo wodi Wængonguī nānō wææ ānō ante ēñēnāmaī cædinque wēnæ wēnæ cægacāimpa. Wæætē Wængonguī edæ Mōitee wodi nānō quēwenganca wææ ānāmaī iñongante Adāo wodi pæināni guiquēnē wēnæ wēnæ cædāni incæte tōmengā nānō ēñēnāmaī cægai bai wii adobai ēñēnāmaī cægadānimpa. Incæte tōmēnāni nē wæwocadāni inte wægadānimpa.

¹⁵ Incæte Wængonguī nānō wææ angainō ante adocanque nānō ēñēnāmaī cægai bai Wængonguī nānō pōnongai iñōmō wii adobai impa. Edæ adocanque nānō ēñēnāmaī cægai beyænque nangui ināni inte wægadānimpa. Incæte Wængonguī guiquēnē nangui pōni waadete

pönö cædinque Itota Codito ingante da pönongä pöningue tömengä adocanque inongä waadete eyepæ pöni pönö cæcä ate mönö nangui pöni imö inte quëwëmompa. ¹⁶ Onguiñængä adocanque wënæ wënæ nänö cægai beyæ nē wæwocadāni bagadānimpā. Wængongui nänö pönongai iñömö edæ wii adobai impa. Adocanque nänö adopoque eññämaï cægainö ante adinque Wængongui tömengä ingante apænte äninque edæ, Bitö tente wæquinque impa, angacäimpa. Wæætē Wængongui nänö wææ angainö ante eññämaï wæætē wæætē cæmö incæte tömengä, Botö ayömo mīni nō entawenguinque impa, ante önonque pönongä ænte entawëmompa.

¹⁷ Waocä adocanque incæ Wængongui nänö wææ angainö ante eññämaï cæcä ininque tömengä adocanque nänö eññämaï cægai beyænque mönö wæwocamö do bagamöimpa. Wængongui guiquënë godömenque eyepæ pöni waadete pönö badongä ate tömengä ayongä mönö nō entawëmö bagamöimpa. Ininque Itota Codito adobai Adocanque iñongante mönö tömengä nempo wæwocadāmaï inte quëwëninque awënëidi bai badinque quëwëmompa.

¹⁸ Mänömaï beyæ adocanque adopoque eññämaï cæcä beyænque Wængongui mönö tömämö imonte apænte äninque, Mīni wænguinquē wënæ wënæ cæmīnīpa, angampa. Ayæ adobai Adocanque adopoque nänö nō cægainö beyænque mönö Wængongui ayongä nō cæmö bamö ininque Wængongui apænte äninque mönö tömämö imonte, Mīni quëwenguinquē mīnitö botö ayömo nō entawëmīni bamīnīpa, angampa. ¹⁹ Edæ

adocanque nänö adopoque eññämaï cægai beyænque mönö nanguï imö incæ edæ nē wënæ wënæ cæmö bagamöimpa. Adobai Adocanque nänö adopoque eññente cægai beyænque mönö nanguï imö incæ edæ Wængongui ayongä nö cæmö bagamöimpa.

²⁰ Mönö waocabo wënæ wënæ cæyömonte Wængongui, Botö wææ änö eññämaï inte cæminipa, ante edonque acæminipa, ante wææ angacäimpa. Wææ angä ate edonque adinque mönö waocabo wæætë, Nanguï eññämaï inte cæte awædö, ante wæyömonte Adocä incæ godömenque nanguï waadete pönö cæcä æmompä.

²¹ Ìninqe mönö eññämaï cægai beyæ mönö nē wæwocamö bagamöimpa. Wæætë mönö Awënë Itota Codito waadete pönö nö cæte badongä ate mönö cöwë wänämaï quëwënguinque Wængongui ayongä nö entawëmö bagamöimpa.

6

Codito nempo quëwëninque mönö nē wïwa cædongä nempo wï quëwëmompä

¹ Ìninqe mönö æbänö anguii. Pancadäniya iïmaï änewänäniipa. Wængongui godömenque waadete pönö cæcæcäimpa, ante cædinque mönö godömenque wënæ wënæ cæcæimpa, ante tedewänäniipa. Mönö iñömö dicæ mänömainö ante tedewenguënëmö imongaa. ² Ìñæmpä ædö cæte mänömainö ante tedewenguii. Wënæ wënæ mönö cæte quëwëmämo pædæ godömo æninqe Codito teëmë mongæninqe wæñngante mönö tömengä tönö godongämæ wænte bai inömo inte ædö cæte

godömenque wënæ wënæ cæte quëwenguüi. ³ Mönö Itota Codito nempo quëwengæïmpa, ante æpænë guïdinqe mönö tömengä tönö godongämæ wængaïmö bai batamompa, ante mïnitö iñömö ëñënämaï imïnitawo. ⁴ Tömengä wænte öñöñongante Mæmpo Wængonguï në ñäö entawënogä inte tæi ëmönongä inte, Ñäni ömæmöe, angä ñäni ömæmongacäïmpa. Ìninqe mönö iñömö edæ, Codito tönö ñäni ömæmonte bai mönö müimö quëwengæïmpa, ante cædinqe æpænë guïdinqe tömengä wodido godongämæ guïite bai wænte bai öñöntamompa.

⁵ Edæ tömengä wængä ate godongämæ wænte bai bagaïmö Ìninqe mönö tömengä ñäni ömæmongä ate tömengä tönö ääwocaque bai ëwocate ñäni ömæmonte bai quëwëmaïmompä.

⁶ Waocä nänö në ö æninäni inte tömengä beyænque cæte në quëwënäni bai mönö adobai wënæ wënæ mönö cædö beyænque wægämöïmpa. Mänömaï inte wæyömonte mönö Codito iñömö, Aamö cæte gocæminïmpa, ante cædinqe wënæ wënæ cæte mönö wentamö mongæñö ö ænte teëmë mongængantapa. Ee mongæñongante tömengä ingante awäa timpodäni wængä adinqe baonque ante mönö wënæ wënæ cæpämö iñömö ëwente bai ba Ìninqe mönö do aamö cæte bai mäninö ante ëmö cæte gomompa. ⁷ Waocä æmæwo wængaingä inte edæ ædö cæte wënæ wënæ cæquingä. Edæ tömengä nänö wënæ wënæ cægainö ante ëmö cæte aamö cæte bai gogaingä ingampa.

⁸ Mönö Codito tönö ääwocaque bai ëwocadinqe adopoque wængaïmö inte mönö tömengä tönö godongämæ quëwengæïmpa, ante wede

pönēmompā. ⁹ Edæ do wænte ñāni ömæmonte mīngä quëwëningä inte Codito wæætë mempoga wænguingä ināmaï ingampa. Tömengä ñöwo wæwocadāmaï iñongante tömengä ingante, Wæmäwe, ante ædö cæte anguii. Iñæmpa, wænāmaï incæcäimpa, ante do ëñëmompā. ¹⁰ Tömengä adopoque wæninqe mönö wënæ wënæ cægäinö ante æmæwo wido cæcæte ante teëmë mongænte wængacäimpa. Wæætë ñāni ömæmonte mīngä quëwëninge tömengä, Wængongui beyænque cæte quëwencæboimpa, ante quëwengampa. ¹¹ Minitö adobaï Codito nempo quëwënomīni inte wīwa mīni cægäinö ante æmæwo wido cæcæte ante cædinqe, Itota Codito tönö adopoque wængäimö imompā, ante wæætë, Mönö Wængongui beyænque cæte quëwengæimpa, ante pönëninge quëwëedäni.

¹² Mänömaï beyæ mīnitö, Baonga mönö ñömænguiñö quëwëninge mönö wënæ wënæ cæinënö ante mönö ëñente cædāmaï ingæimpa, ante nāmā wææ aadinqe edæ wënæ wënæ mīni cæinëwënö ante edæ ëñënāmaï inte quëwëedäni. ¹³ Ayæ mīnitö, Bado, ante edæ, Botö baonca wīwa cæcæimpa, ante edæ mīnitö baö quiomë i incæ wënæ wënæ cæquinqe ante edæ godö cædāmaï iedäni. Wæætë do wæwocagäimīni inte ñāni ömæmonte mīimīni quëwëninge mīnitö wæætë Wængongui ingante nāmā godömīni æncæcäimpa. Edæ, Botö baö ini edæ tömäo Wængongui qui impa, ante pædæ godöninge mīimīni quëwëñöminite tömengä wæætë mīnitö tönö godongämæ cædinqe nö pönī cæcæcäimpa. ¹⁴ Edæ Möitee wodi nänö

wææ angainö ante eñemini incæte wii mäninö beyænque quëwëminipa. Wæætë Wængongui waadete pönö cæcä beyænque quëwëmini inte minitö wënæ wënæ mini cæinëwënö ante eñente cädämai inte quëwencëminipa.

Wiwa mönö cæinëwënö ante mönö eñënämai ingëimpa

¹⁵ Möitee wodi nänö wææ angainö ante eñente beyænque wii quëwëmö inte mönö Wængongui waadete pönö cæcä beyænque quëwëmompä. Näwangä impä. İinque mönö æbänö cæquii. Wadäni iñömö idiquibæ ante pönëningue, Wængongui pönö cæcä beyænque në quëwënömö inte mönö wæætë wënæ wënæ cæcëimpa, ante tedewënanipa. Mönö iñömö ædö cæte mänömainö ante cæquimö.

¹⁶ Wacä ingante në cæte quëwëmini bacæte ante cædinque minitö, Bado, bitö botö awënë badinque edæ ämi eñente në cæbo baboe, ämini ininque edæ mäningä minitö iminite ö ængä ate tömengä beyænque cæte quëwëmaimnipä. Mäninö ante pönëminiyaa. Ayæ adobaï minitö wënæ wënæ cæinente mini wädö ante Ao ante cæmini ininque mini wænguinque edæ mäninö beyænque cæte në quëwëmini inte wëbaimnipä. Wæætë Wængongui ingante, Bado, bitö botö Awënë inömi inte edæ ämi eñente në cæbo baboe, äninque minitö nö cæte mini quëwëningue tömengä beyænque në cæmini babaïminipa. ¹⁷ Minitö doyedë mini wënæ wënæ cæinëwënonque ante cædinque minitö awënë beyænque cæte në quëwëmini bai ingaminipa. Nöwo guiquënë Wængongui nö nänö änö ante odömömöni eñëningue minitö iinonque

ante edæ nē ēñente cæmīni bamīnitapa. Mänōmaī bamīnīpa, ante adīnque botō Wængonguī ingante waa ate pōnēnīnque apænebopa. ¹⁸ Ayæ wēnæ wēnæ mīni cædō beyænque cæte nē quēwēmīni inte wæyōmīnite Wængonguī ñīmpo cæcā ate mīnitō abæ tawænte ee gote baī quēwēmīnīpa. Ñōwo wæætē tōmengä nänō nō cædonque ante ēñente cæmīni īnīnque mīnitō edæ nē nō cædongä nempo quēwēnīnque tōmengä beyænque cæte nē quēwēmīni bamīnīpa.

¹⁹ Mīnitō önōmīnīque inte æīquedō ædæmō ēñenguīmīnīi, ante wædīnque botō, Waocā nänō cæī baī impa, ante tēdēdīnque odōmōmo aedāni. Wēēñēñedē wēnæ wēnæ cædīnque godōmenque quīngāmē baī quēwēncæte ante mīnitō, Bado, ante quīomē incæ mīni baonga wīwa cæquīnque pædæ godō cæmīnitapa. Mänōmaī beyænque ēñēñāmāī mīni cæīñēwēñō ante ēñente cædīnque edæ mīnitō māñīnonque ante nē cæte quēwēmīni īngamīnīmpa. Ñōwo guīquēñē tæiyæ wæmō mīni ēwocate quēwēngūnīque ante mīnitō baō īnī edæ, Wængonguī quī impa, ante tōmāo pædæ godōedāni. Ayæ mīni nō cæquīnque ante edæ tōmengä beyænque nē cæmīni inte quēwēedāni. ²⁰ Wēēñēñedē īñōmō mīnitō wēnæ wēnæ mīni cæīñēñō beyænque cæte nē quēwēmīni baī inte wægāmīnīmpa. Māñīñedē mīnitō nē nō cædongä nempo quēwēñāmāī īngāmīnī inte tōmengä nänō angāīñō ante edæ ēñēñāmāī īngamīnīmpa. ²¹ Māñīñedē quīngāmē baī mīni cægāīñō ante pōnente wædīnque mīnitō ñōwo īñōmō guīngo īmonte bamīnīpa. Edæ māñīñō mīni wīwa cægāīñō

beyæ ante dicæ watapæ tote baminiyaa. Ìñæmpa edæ mīni wænguinque mǎnōmaī cægaminimpa.

²² Ñōwo guiquēnē, Wēnæ wēnæ mīni cæinēwēnō ante idæwaa ēñencæminimpa, ante cædinque Wængonguī gǎ pe æmpote ængǎ ate mīnitō abæ tawænte baī Wængonguī nempo wæætē ee pongaminimpa. Ìninqe nē gǎ pe æmpocǎ nempo quēwēninqe mīnitō tōmengǎ ingante cæte nē quēwēmīni inte mīni cōwē wænāmaī quēwenguinque tæiyæ waēmō ēwocamīni bamīnipa.

²³ Mōnō waocabo mōnō wēnæ wēnæ cædō beyæ ante paga cæte baī cædinque Wængonguī mōnō ïmonte pōnō pangǎ wænguēnēmō ïmōmpa. Wæætē, Wantæpiyæ quēwencæminimpa, ante adocǎ incæ mōnō Awēnē Itota Codito tōnō godongāmæ cædinque mōnō ïmonte ōnonque pōnō ængǎ beyænque mōnō cōwē wænāmaī quēwēmōmpa.

7

Èñente cæquēnēmō inte ñǎ cæyænte baī ingamōimpa

¹ Ìñānāni ēñēedāni. Mōitee wodi nānō wææ ante yewæmongainō ante do adīmīni ïmīni incæte mīnitō ïmaī ante ēñēmīniyaa. Edæ, Èñente cæedāni, ante tōmengǎ mīināni quēwēnānique ïnānite wææ ante yewæmongacāimpa. Ìninqe waocǎ do wæningǎ ïñongante, Cæe, añōmō tōmengǎ mīingǎ ingampa diyæ cæquingǎā. Edæ dobæ wængāimpa.

² Ìīmaīnō ante pōnēedāni. Onquiyængǎ ingante ñānōnāni mongǎ ate tōmengǎ nānōogængǎ mīingǎ nānō quēwenganca onquiyængǎ ïñōmō tōmengǎ nānōogængǎ ingante èñente quēwencæcāimpa,

ante wææ ante yewæmongatimpa. Wæætë edæ tōmengä nänöogængä wængä ate onquiyængä owæmpoingä inte adocanque quëwëñongante mänömainö ante edæ ædö cæte wææ anguii.

³ Ìninqe nänöogængä ayæ mīngä quëwëñongante onquiyængä wacä ingante godö guëa mongä adinque, Bitö nänöogængä mīngä iñongante bitö wacä ingante guëa godö mömipa tōö, ante piinänipa. Incæte tōmengä nänöogængä wængä ate abæ tawænte gote bai tōmengä adocanque quëwëñongante, Wacä ingante mönämai incæbiimpa, ante ædö cæte wææ anguinäni. Do owæmpodingä inte wacä ingante mongä adinque tänocä quëwengampa diyæ wææ anguinäni. Edæ owæmpodingä inte tōmengä do mongampa.

⁴ Mänömai beyæ botö tönīñamini, Mönö adobai imompa, ante ämo ëñeedäni. Nänönäni në möningä iñömö ëñente cæquënegä ingä bai mīnitö wëenëñedë adobai Möitee wodi nänö wææ angainö ante ëñente cæquënemini inte ñä cæyænte bai ingamīnimpä. Mänömai inte wæyömīnite Codito iñömö, Mīnitö botö nempo quëwëninque waincate bai cæmīni badinque Wængongui beyænque ante ëñente cæcæmīnimpä, ante pönö cægacäimpä. Tōmengä baonga ponte ëñadinque mönö beyæ wëninque ñäni ömæmongacäimpä. Ìninqe mönö tōmengä tönö adobai wænte bai ingaimö inte mönö wëenëñedë mönö ëñenguënegainö ante edæ ædö cæte wæætë ëñenguënemö inguimöö. Wæætë edæ në ñäni ömæmongaingä nempo quëwënömo inte mönö tōmengä quimö inömö imompa.

⁵ Doyedë iñömö mönö në wæwocamö inömö inte

baonque ante pönente mönō quēwēñedē Möitee wodi nänō wææ angainō ante ēñente wædinque godömenque wīwa cæinēwente wæmō batamompa. Īninqe mönō baaca incate bai cædinque mönō wænguinque wënæ wënæ cætamompa. ⁶ Wēenēñedē wææ änāni ate mönō, Ædō cæte ēñente cæquīi, ante ñā cæyænte bai wægaimō inte mönō edæ Codito tönō adopoque wænte bai ñī cæyænte bai bagamöimpa. Ñöwo guiquēnē adopoque wægaimō inte mönō Möitee wodi pedæne ante nänō wææ ante yewæmongainō ante wīi ēñente cæquēnēmō inte abæ tawænte bai gomompa. Wæætē edæ Wængongui Tæiyæ Waemō Önöwoca beyæ quēwēmō inömō inte mönō tömengä miine nänō änonque ante ēñente cæmō imompa.

Wënæ wënæ botō cædō beyæ ante wæbopa, ante

⁷ Īninqe æbänō ante anguimoo. Möitee wodi, Wënæ wënæ cæqui, ante yewæmongacäimpa, ante botō dicæ antawogaa. Ædō cæte edæ mänömaï anguīi. Īñæmpa tömengä wææ änāmaï ingä bai botō, Quinō wënæ wënæ cæte i, ante ēñenāmaï incædömoimpa. Botō edæ, Wacä qui æinente wæbo incæte botō ænāmaï inte ee abo inte waa cæbopa, ante pönengaboimpa. Möitee wæætē, “Wacä qui ante æinente wædāmaï ie,” ante wææ angä beyænque botō, Æ æinente botō wædō incæ wënæ wënæ impa, ante tæcæ ēñentabopa. Mäninō ante änāmaï ingä bai botō, Wënæ wënæ impa, ante ēñenāmaï incædömoimpa. ⁸ Īninqe nē wënæ wënæ cædömo inte botō Möitee nänō wææ angainō ante önömoncaque ēñente ate botō quingämē bai tömancoo ante godömenque æinente wætabopa. Edæ

tömengä wææ änāmaï ingä bai mönō wënæ wënæ cædō iñömō edonque ināmaï inte edæ dæ ante bai incædōnimpa.

⁹ Möitee wodi wææ ante nänō yewæmongainō ante botō adāmaï imoyedē botō ōnonque wædāmaï quēwengaboimpa. Wæætē, Īimaï wææ ante yewæmonte ongompa, ante adinque botō, Æ, wënæ wënæ cæbo imopa, ante tæcæ ēñēninque, ¹⁰ edæ nāñe wænte bai botō, Wæwocabo imopa, ante wætabopa. Edæ, Īimaï cædinque quēwencæminimpa, ante wææ ante nänō yewæmongainta adinque botō edæ, Botō wænguinque wīī ēñente cæbopa, ante tæcæ ēñēninque wætabopa. ¹¹ Edæ Möitee wodi wææ ante nänō yewæmongainta do adīmo inte mǎnīnō ante ēñēnāmaï cædinque botō pante wænguinque wënæ wënæ cætabopa. Edæ, Ōnonque wënæ wënæ cæte tocæī, ante wapiticæ pōnente cæyōmote tömengä nänō wææ angainō ante odömönāni ēñēmo beyænque botō, Æ, botō wænguinque wënæ wënæ cæbopa, ante wægaboimpa.

¹² Wængonguī nänō wææ angainō iñömō tæiyæ waēmō inepa. Ayæ Möitee wodi adobaï mǎnīne tæiyæ waēmō inedō ante apænedinque, Īimaï cæedāni, ante wææ āninque, Mini waa cæte quēwenguinque ēñente cæcæminimpa, ante nōingä pōnī angacāimpa.

¹³ Īinque tömengä, Mini waa quēwenguinque impa, ante nänō wææ angainō incæ botō imote ædō cæte wænonguīī. Wængonguī wæætē, Quīnō wënæ wënæ cæte ī, ante edonque acæminimpa, ante pōnō waa cædinque, Mīnitō ēñēnāmaï imīni

beyænque mīni wænguinque impa, ante wææ angacäimpa. Ìninqe Wængonguī nānō wææ angainō beyænque botō iñömō, Wēnæ wēnæ cægaboimpa, ante edonque atabopa.

¹⁴ Mīnitō tæiyæ waēmō ēwocacæminimpa, ante Wængonguī mōnō ōnōwoca beyænque ante wææ angacäimpa, ante do ēñēmompā. Incæte botō wīwa cædonō beyænque cæte nē quēwēmo inte botō edæ ōmæwocate bai inte wæbopa. ¹⁵ Edæ botō waa cæinente wædō ante cædāmaī inte botō wæætē edæ, Wīī cæinente awædō, ante botō piinte adō incæ edæ do cæte wæbopa. Ìninqe botō, Æbānō cæboo, ante ēñēnāmaī ïmopa. ¹⁶ Wængonguī nānō wææ angainō ante ēñēnāmaī cæbo incæte botō ēñēnāmaī botō cædō ante wīī cæinēmopa. Mānōmaī botō wīī cæinēnō beyænque botō, Wængonguī waa cædinque wææ angacäimpa, ante bai cædinque tōmengā nānō wææ angainō ante edæ Ao ante bai cæbopa. ¹⁷ Incæte botō wodi wīī tōmēmo ānō ante cæbopa. Wæætē edæ botō wīwa entawēnō beyæ wīī cæinente botō wædō ante do ēñente cædinque wæbopa. ¹⁸ Edæ ancaa waa cæinente wæbo incæte botō dicæ waa cæbogaa. Mānōmaī beyæ botō, Botō baonga quēwēninqe botō waa cæquinō iñömō edæ dæ ampa, ante do ēñēmopa. ¹⁹ Waa pōnī botō cæinēnō incæ cædāmaī inte wæbopa. Wæætē edæ wēnæ wēnæ cæte botō wīī cæinente wædō ante ancaa cæte wæbopa. ²⁰ Ìninqe botō wīī cæinēmo inte do cæbo ïninqe wīī tōmēmo cæbopa. Wæætē wīwa cæquinque botō entawēnō beyænque edæ wēnæ wēnæ cæte wæbopa.

²¹ Waa cæinente wæbo incæte botō wēnæ wēnæ cæquinō edæ do entawente wæbopa. Ìninqe

botö ñä cæyænte bai ïmopa, ante do abopa.
²² Edæ botö Wængongui nänö wææ angainö ante
 mimönë pönëningue watapæ tobopa. ²³ Incæte,
 Wængongui nänö wææ angainö ante botö pönënö
 incæ eñënamai ingæimpa, ante botö edæ wade
 wææ ante entawente bai inte wæbopa. Ìinque
 nämä wææ ante bai mimönë botö pönënö tönö
 wade, Eñënamai ingæimpa, ante wææ ante botö
 entawënö tönö näëmæ guëadö guëa cæ bai inte
 wæbopa. Edæ mänine beyæ wiwa botö cæquinö
 entawëningue botö yæguincamenca ñä cæyænte bai
 inte wæwëmopa.

²⁴ Edæ cætawente wængui wæ. Botö wiwa
 cæquinö entawente beyæ botö wænguiñö
 eñate wæyömote æcänö edæ æna beyænque
 quëwëmaimoo, ante wæbopa. ²⁵ Edæ, Itota
 Codito beyænque quëwenguimo ïmopa, ante botö
 Wængongui ingante waa ate pönente apænebopa.
 Ìinque Wængongui nänö wææ angainö ante
 eñëningue botö tömöno mimöno tömengä beyænque
 cæte në quëwëmo ïnömo ïmopa. Incæte botö
 eñayö beyæ botö wiwa cæinënö beyænque cæte
 në quëwëmo inte wæbopa.

8

*Wængongui Önöwoca ingante ewocate
 quëwengæimpa*

¹ Ìinque mönö Itota Codito nempo quëwëningue
 mönö wiwa cæinente wæwënö ante cædämai
 inömo inte wæætë tömengä Önöwoca pönö angä
 eñëningue cæte quëwëmö adinque Wængongui
 iñömo, Mini wænguingue, ante apænte änämai

ingampa. ² Edæ wīwa cæinente mōnō wæwēnō ante mōnō wænguinque ēñente cæyōmonte Itota Codito iñōmō pōnō gā peyæmpote bai ò ængā beyænque mōnō abæ tawænte ee gote bai quēwēmōmpa. Ayæ tōmengā Ōnōwoca nē quēwēnongā nānō wææ änō ante wæætē mōnō ēñente cæinente quēwēmōmpa.

³ Edæ Mōitee wodi, Īmaī cædāni, ante wææ añongā mōnō iñōmō wīwa cæinente mōnō wæwēnō beyænque aquīi piñænāmaī ēñadōmō inte, Mōnō ædō cæte ēñente cæquīi, ante wægāmōmpa. Mōnō waocabo mǎnōmaī wēnæ wēnæ cædōmō inte wæyōmō Wængonguī wæætē, Waocā bacæcāimpa, ante tōmengā Wengā ingante da pōnongā pōninque mōnō wīwa cæinentai bai adotai bai ēñate pægacāimpa. Ēñate pædinque tōmengā nāmā baō nānō ēñayō ante edæ, Wængonguī qui impa, ante pædæ godonte bai cædinque wēnæ wēnæ mōnō cædō beyænque ante wægacāimpa. Mǎnōmaī cædinque Wængonguī mōnitō ĩmōnite apænedinque, Mini wænguinque mīnitō baonga ēñadinque wēnæ wēnæ cæmīni awædō, ante apænte angacāimpa. ⁴ Mǎnōmaī pōnō cædinque tōmengā, Wīwa cæinente mīni wæwēnō ante ēñente cædāmaī inte mīnitō ñōwo wæætē botō Ōnōwoca ingante ēwocadinque tōmengā beyænque quēwēmīnīpa. Īninque nō pōnī botō wææ angāinō ante tōmānō ante ēñēninque nō cæte quēwencæmīnīmpa, ante cægacāimpa.

⁵ Adopoque ēñadinque baonque nē ēñadāni guiquēnē wīwa cæinente nāni wæwēnō ante pōnente cædānīpa. Mempoga ēñadinque Wængonguī Ōnōwoca ingante nē ēwocadāni guiquēnē tōmengā nānō ānonque ante pōnente cædānīpa. ⁶ Wīwa

cæinente nāni wæwënö ante cæcæte ante nē pönëwënāni guiquënë tōmënāni nāni wænguinque mäninö ante pönëwënānīpa. Wæætë Wængonguī Önöwoca angä eñente nē pönënāni guiquënë tōmënāni nāni gänë entawente quëwenguinque edæ mänömaī pönënānīpa. ⁷ Waodāni wīwa nāni cæinente wæwënö ante cæcæte ante nē pönëwënāni iñömö edæ Wængonguī ingante piinte cædānīpa. Wængonguī nānö wææ änö ante tōmënāni önömoncaque eñënāni inte edæ wīi eñente cædānīpa. Iñæmpa tōmengä Önöwoca ingante ëwocadānīpa diyæ eñente cæquinānīi. ⁸ Wīwa cæinente nāni wæwënö ante cæcæte ante nē cædāni iñömö, Wængonguī waa acæcäimpa, ante ancaa cædāni incæte Wængonguī wæætë edæ waa todāmaī incæcäimpa.

⁹ Minitö guiquënë Wængonguī Önöwoca ingante ëwocamīni iñinque edæ wīwa cæinente mīni wæwëninö ante cædāmaī inte quëwëmīni imaīmīnīpa. Wæætë edæ tōmengä Önöwoca angä eñente cæte quëwëmaīmīnīpa. Incæte waocä æcāmenque incæ Codito Önöwoca ingante ëwocadāmaī ingä iñinque tōmengä wæætë Codito nempo quëwënāmaī imaingampa. ¹⁰ Minitö guiquënë Codito ingante entawëmīni iñinque wënæ wënæ mīni cægainö beyænque mīnitö baö incæ tōmengä tönö adopoque wænte baī eñamīnīpa. Incæte Codito nānö nō cædönö entawëmīni inte mīnitö önöwoca mempoga eñate baī mīiwoca ëwocamīnīpa. ¹¹ Itota ingante Wæmpocä, Ñāni ömæmöe, angä eñëninque ñāni ömæmongacäimpa. Ayæ mīni baö ñömæintai

eñayöminite tömengä Önöwoca pö guiddinque quëwengä ïinque Wæmpocä wæætë mïnitö ïminite, Ññani ömæmöe, ante adobaï angä ññani ömæmoncæminimpa. Edæ tömengä Önöwoca mïni nê ewocadongä tönö tömengä pönö cæcä ate mïnitö baö incæ ñömænämaï intai bacæimpa.

¹² ïinque botö tönïñamïni eñëedäni. Wængonguï Önöwoca angä ate mönö eñente cæquënëmö ïmompä. Wæætë wïwa cæinente mönö wæwënö ante wïï eñente cæte quëwenguënëmö ïnömö ïmompä. ¹³ ïñæmpä wïwa cæinente mïni wæwënö ante eñente cæmïni ïinque mïni æmæwo wænguinque cæbäimïnipä. Wæætë Wængonguï Önöwoca ingante ewocadinque mïnitö wïwa mïni cædinö ante wido cæmïni ïinque mïni quëwenguinque ïmaimpa.

¹⁴ Ædänidö ïänite Wængonguï Önöwoca töö æmænte angä ate eñente goda ïñömö tömënäni ïñömö edæ Wængonguï wënäni ïänipä. ¹⁵ Mïnitö guïñente mïni wægäinö beyænque ññä cæyænte baï nê quëwengäimïni inte ññowo wæætë Wængonguï Önöwoca ingante æninque wïï adobaï guïñente wæmïni ïmïnipä. Wæætë Wængonguï Önöwoca pönö cæcä beyænque mïnitö näwä wëmïni bamïnipä. Ayæ tömengä Önöwoca pönö cæcä ænte ewocadinque mönö guïñenedämaï inte edæ, Mæmpo, botö Wæmpo, ante apænemompä. ¹⁶ Edæ mönö mïmönë ponte apænedinque Wængonguï Önöwoca incæ, Bitö Wængonguï näwä wëmi ïnömi ïmipä, ante apænecampä. ¹⁷ ïinque mönö Wængonguï wëmö ïnömö inte tömengä nänö pönonguincoo nê ænguïmö

imompa. Edæ Codito tönö aanque bai caate wæmö inique mönö tömengä ñäö bai nänö emö bai ñäö adobai emöinque tömengä tönö edæ godongämæ ænguimö imaimompa.

Ñäö bai mönö entawenguimämo

¹⁸ Botö iimaï ante pönemopa. Ñöwo caate mönö wæpämö iñömö pönömenque iñonte ñincayæ ate ñäö bai mönö emonguimämo guiquenë wii adobai wædænque inte godömenque nangui pöni ingæimpa. ¹⁹ Æyedënö Wængongui wënäni tæi emonte badinque edonque a ongonguinänii, ante acæte ante edæ Wængongui nänö badongaincoo incæ nangui ainente wædinque wänö conte bai ongoncoopa. ²⁰ Edæ wënæ wënæ cædämaï incoo iñonte mönö waocabo mönö eññänamaï cægainö beyæ Wængongui nänö badongaincoo önoncooque bai bagatimpa. Wii nämä änö beyæ mänömaï bagatimpa. Wæætë Wængongui në, ñincayæ ate watapæ bacæimpa, ante angaingä inte adocä angä beyænque önoncooque bai bagatimpa. ²¹ Edæ Wængongui nänö badongaincoo ñömænguincocooque inte yæguincamenca ñä cæyænte bai wæyoncoote Wængongui gä pe æmpote bai godö cæcä beyænque ñömænämaï inguincocooque bacæcoimpa. Mönö Wængongui wëñæmö iñömonte tömengä pönö ñimpo cæcä ate mönö abæ tawænte bai tæi emonte bamö bai tömengä nänö badongaincoo adobai abæ tawænte bai miincooque bacæcoimpa. ²² Wëñæ nantate, Æiquedö eññaqingäa, ante nani wæ bai Wængongui nänö badongaincoo incæ ñöwo ganca godongämæ nantate bai, Æiquedö waa baquüi, ante ö ö wæconcoopa.

²³ Ayæ Wængonguï mönö ïmonte mä pönöningue tömengä Önöwoca ingante pönongä ænte do ewocamö ïnömö inte mönö adobai, Mönö baö müñö eñäquinque æiquedö Wængonguï wēñæmō ædæmō baquïi, ante nanguï æïnente wänö conte ö ö wæmompä. ²⁴ Edæ Codito, Botö ïncayæ ate badömo ate watapæ bacæimpa, ante pönëdäni, äningue mönö ïmonte edæ ængä beyænque quëwëmompä. ïningue mäninö edæ, Watapæ bacæimpa, ante nänö angainö ïñömö ïinque ba acæte ante mönö ayæ wänö cömompä. Mäninö watapæ do ba amö bai mönö, Ayæ ate watapæ ba acæimpa, ante änämaï incædömöimpa. Waocä do æningä inte, Æïnente wæbopa, ante quïnante anguingää. ïñæmpä edæ dobæ ængantapa. ²⁵ ïningue mönö æïnente wædö ante mönö cöwë ængæimpa, ante wede pönëmö ïinque mönö wæntædämaï inte ee wänö cömompä.

²⁶ Ayæ adobai mönö aquïmö pönï ïñömonte Wængonguï Önöwoca mönö beyæ cæcampa. Æbänö cæte Wængonguï ingante apænequïi, ante eñënämaï inte wæyömonte tömengä wïi waomö tededö ante apænedinque tömengä önöwënenque mönö beyæ apænecampa. Mäninö tömengä nänö tededönö ante mönö guiquënënö inte önöneca ædö cæte tedequïi. ²⁷ Mönö Wængonguï quïmö tæiyæ waëmö ewocamö ïñömonte Wængonguï Önöwoca ïñömö mönö beyæ apænedinque, Mæmpo Wængonguï nänö angainö bai bacæimpa, ante pönëningue apænecampa. ïningue mönö mimöno do adongä inte Mæmpo Wængonguï ïñömö edæ, Botö Önöwoca æbänö pönëningue apænecää,

ante do eñengampa.

Nē tæi emöninque mönō gänä cæmō imompa, ante

²⁸ Wængongui, Botō änō bai iinque bacæimpa ante cæcæminimpa, ante mönō imonte aa pegacäimpa. Iinque tömengä nänō änō bai nē cæmō inte mönō tömengä ingante waadete pönemō iñomonte Wængongui wæætē mönō beyænque cōwē waa pönō cæcä ate mönō edæ, Inguipoga æbämē ba incæte mönō waa pōni quēwenguinque impa, ante edæ do eñemompa. ²⁹ Doyedē badöninque Wængongui iñömō, Botō Wengä Bamoncadengä iñongante iināni tömengä biwīdi badinque nanguī ināni yebænte bacædänimpa, angacäimpa. Iinque tömengä mänōmai cæcæte ante cædinque, Do botō nē againāni iñömō tömēnānique botō Wengä nänō entawēnō bai adobai entawencædänimpa, ante badongacäimpa. ³⁰ Ayæ, Botō Wengä nänō entawēnō bai entawencæminimpa, ante nänō nē angaināni iñönānite do aa pegacäimpa. Ayæ tömengä nänō aa pegaināni adodāni inānite, Botō ayōmo mīnitō nō cæmīni bacæminimpa, ante badongacäimpa. Tömengä ayongä nō cædāni nē bagaināni inānite tömengä, Mīnitō tæi emonte badinque ñāō bai emonte bacæminimpa, ante do badongacäimpa.

³¹ Iinque æbänō ante anguimoo. Edæ Wængongui mönō tönō godongāmæ cæcä iñongante æcänō mönō imonte bæ taquingää. Edæ dæ angampa. ³² Tömengä Wengä adocanque iñongante Wængongui pæ gompodāmai inte da pönongä pöninque tömengä wæætē mönō tömāmō beyæ teēmente wæætē wængacäimpa.

Mäningä ingante da pönöningue Wængongui tömengä nänö ägaincoo ante ædö cæte pönönämaï inguingää. Edæ, Botö Wengä tönö godongämæ entawencæminimpa, ante Wængongui tōmancoo do pōnongä æmompā. ³³ Wængongui mönō imonte apænte ængä ongõñomonte æcänö, Wiwa cæbipa töö, ante apænte anguingää. Ìñæmpa Wængongui incæ, Botö ayömo mīnitö edæ nō cæmīni imīnīpa, ante badongä bamöimpa. ³⁴ Itota Codito nē wængaingä inte godömenque ñāni ömæmongaingä inte Wængongui tömēmæ inö do tæ contate a ongongampa. Ayæ mönō beyæ Wængongui ingante cōwē apænecampa. Tömengä mänömaï cæcä adinque mönō imonte æcänö, Bitö wænguinque, ante apænte anguingää. Ìñæmpa wīi eyepæ inānīpa.

³⁵ Codito mönō imonte waadete pönente aayongä æcänö gä pe æmpote ö ænguingää. Edæ, Ædö cæte cæquimöö, ante wæmö incæ caate wæwëmö incæ mönō imonte togænte pänāni wæmö incæ mänömaï wæyömonte mönō Codito dicæ mǎniñedē edæ waadedämaï inguingää. Mönō wænguinque gue ænente wæmö incæ weocoo ömaamö inte wæmö incæ tömengä mönō imonte dicæ waadedämaï inguingää. Quiēmē beyæ, Mīni wænguinque, ante wææ änāni wæyömonte yaēmenca tacadāni wæyömonte Codito mǎniñedē dicæ waadedämaï inguingää. ³⁶ Edæ Wængongui ingante ämotamīni ante bai yewæmongatimpa.

“Bitö beyænque wænönāni wængui wæ, ante
mönitö tömää itæde wæmönīpa.

Obegaidi inānite, Wængongæimpa, ante änāni bai,

mönitö imönite adobai, Wæñongæimpa, ante
piināni wæmönipa,”
ante yewæmante ongö aedāni.

³⁷ Edæ mänimāmo mönö wæpāmo tömāmāmo
pö ate wædömö incæte mönö imonte nē waadete
pönengä nempo ongöñinque mönö tæi emonte
godömenque gänä cæte ongömompā. ³⁸ Botö do
ēñente pönēmopa. Mönö nē waadete pönengä
nempo ongöñomonte mönö wænguimāmo
incæ mönö quëwenguimāmo incæ anquedoidi
incæ wænæidi incæ ñowopāmo incæ iincayæ
ponguimāmo incæ tæi nāni piñæmāmo incæ
mänimāmo tömāmāmo ædö cæte mönö imonte
gä pe æmpote ö ænguüi. ³⁹ Ayæ edæ æibæ mönö
æite wæquimāmo incæ guibæ mönö wæænte
wæquimāmo incæ quiëmë Wængonguï nänö
badongaimāmo incæ mänimāmo tömāmāmo iñömö
mönö Codito nempo ongöñomonte ædö cæte
gä pe æmpote ö ænguüi. Edæ Wængonguï nänö
waadete pönënö entawëñinque mönö Awënë Itota
Codito iñömö mönö imonte waadete pönëñinque pæ
gompyongante mänimāmo tömāmāmo incæ Gä pe
æmpote ö ænämaï ingæimpa. Ämo ëñëmaïminipa.

9

*Idægoidi inänite Wængonguï apænte angacäimpa,
ante*

¹ Botö iñömö edæ mimö entawëmo inte
nämä apænte pönëñömote Wængonguï Tæiyæ
Waëmö Önöwoca adoyömö ante apæñecä ininque
botö ædö cæte babæ wapiticæ anguïmoo.
Edæ Codito nempo quëwënömo inte botö nö
pöni apæñedinque iïmaï ämopa. ² Mimöno

cōwē cæwēnente wæwēmo inte botō iīmaī ante pōnēnīnque nangūī wæbopa. ³ Botō guīdēnāni botō tōnō adodāni īnōnāni īñōnānite Wængonguī ængā beyænque quēwencædānīmpa, ante botō nangūī ānīnque wæbopa. Īnīnque Wængonguī tōmēnāni īnānite, Quēwencæmīnīmpa, ante ænīnque wæætē botō Codito nempo quēwēñōmote botō īmote pīīnīnque tatodonte wido cæcā bai botō Ao ante piyæñē cæcædōmoīmpa.

⁴ Tōmēnāni īñōmō idægoidi īnānīpa. Wængonguī pæpogacā pædāni īnīnque tōmēnānīque tōmēngā wēnāni īngadānīmpa. Tōmēnāni īnānite Wængonguī ñāō entawente nānō tæī ēmōnō ante odōmongā adīnque tōmēnānīque nē agāīnāni īnānīpa. Tōmēnāni īnānite apænedīnque Wængonguī, Botō pōnō cæbo ate mīnitō Ao āmīni īnīnque mōnō godongāmæ waa cæcæīmpa, ante cægacāīmpa. Īīmaī cæedāni, ante tōmēngā tōmēnāni īnānite tāno wææ angā ēñēnte mānīnō nānō wææ angāīnō ante tōmēnānīque nē mangāīnāni īnānīpa. Wængonguī oncōnē ñæñæncōnē wadāni guīdāmaī īñōnānite idægoidīque guīte tōmēngā īngante waa ate ædæ wæænte apænedānīpa. Tōmēnānīque īnānite Wængonguī, Cōwē waa cæcæboīmpa, ante mā apænegacāīmpa. ⁵ Mōnitō, Mæmæīdi, ante mōni nē angāīnāni incæ idægoidi mæmæīdi adodāni īnānīpa. Īnīnque tōmēnāni Pæīngā badīnque mōnō Codito īnguīpoga ēñagacāīmpa. Tōmēngā īñōmō tōmāmō Wængonguī īnōngā īngāmpa, ante adīnque mōnō tōmēngā īngante apænedīnque, Tōmēmi toquinque pōnō waa cæbi æmōnīpa, ante mōnō cōwē ñīmpo cædāmaī apænecæīmpa. Mānōmaī

impa, ante botö, Amëë, ämopa.

⁶ Idægoidi quëwencädänimpa, ante nänö angainö bai Wængonguï cädämaï ingacäimpa, ante botö dicæ ämogaa. Wæætë edæ iïmaï impa. Nāwä idægoidi nāni wede pönēnō bai pancadāniya pönēnāmaï ināni iñōnānite botö tōmēnāni inānite, Nāwä idægoidi inānipa, ante apænedāmaï imopa. ⁷ Edæ Abadäo wodi pæināni incæ pancadāniya iñōmō, Abadäo wodi wēnāni, mōnō änōnāni wii inānipa. Wæætë, “Botö ayōmo Itæca wēnānique bitö pæināni inguīnāni inānipa,” ante mæmæ Abadäo ingante Wængonguï angampa, ante yewæmongatimpa. ⁸ Mänōmaï i iñinque Abadäo tapæicā nē ēñate pædāni inānite Wængonguï, Abadäo wēnāni, ante angantawogaa. Wæætë Abadäo wodi ingante apænedinque, Bitö wēnāni bacädänimpa, ante Wængonguï nänö nē angaināni guiquēnē tōmēnānique tōmengä wēnāni inānipa. ⁹ Edæ, “Iñedē impa, ante botö änōñedē botö adodö pōmo ate mänīñedē ate edæ Tada incæ wēñængä onguīñængä ingante mancæcäimpa,” äninque Wængonguï, Mäninö botö änö bai cōwē cæcæboimpa, angacäimpa.

¹⁰ Wii mäninque impa, ante ēñengæimpa. Godōmenque iïmaï ante mōnō pönengæimpa. Wæmpocā adocanque tapæicā ate Adebeka wodi wēna äancadēnaque ēñagadäimpa. Mänina wæmpocā iñōmō mōnō wæmæ Itæca wodi ingacäimpa. ¹¹ Tōmēnä wēna ayæ ēñadāmaï iñedē ædö cæte wēnæ wēnæ cæquīnaa, ædö cæte waa cæquīnaa. Incæte edæ Wængonguï, Iñgä ingante apænte æncæboimpa, ante nänö

angainö ante cöwë bacæimpa, ante cædinque,
¹² tömëna ayæ cædämaï iñönate Wængongui nê aa
 pedongä inte, “Bamoncadengä incæ ayæmengä
 ingante nê cæcä incæcäimpa,” ante Adebeca
 wodi ingante apænegacäimpa. ¹³ Adobainö
 ante Wængongui beyæ yewæmongadänimpa.
 “Aacobo ingante waadete pönengaboimpa. Etawoo
 ingante guiquënë piinte agaboimpa,” ante
 yewæmongatimpa.

¹⁴ İninque mönö æbänö anguii. Wængongui dicæ
 nö cædämaï ingantawogaa. ¹⁵ Wæætë Möitee
 wodi ingante apænedinque Wængongui iïmaï
 angacäimpa. “Waocä adocanque ingante botö,
 Wii päinewædö, äninque tömengä ingante do godö
 ñimpo cædinque pänämaï incæboimpa. Adocanque
 ingante nê waadete cæinëmo inte botö tömengä
 ingante do godö waadete waa cæcæboimpa,”
 angacäimpa, ante yewæmongatimpa. ¹⁶ İninque
 waocä nanguï cæinengä incæte waocä nanguï
 cæcä incæte Wængongui wii waocä nänö cædö
 beyænque apænte ængampa. Wæætë nämä nänö
 waadete waa cæinënö beyænque Wængongui
 waocä ingante godö apænte ængampa. ¹⁷ Edæ
 awënë Padaönö wodi ingante apænedinque
 Wængongui, “Botö iïmaï ante cæcæte ante bitö
 imite ængö cætabopa. Edæ bitö imite ængö
 cædinque tæi piñænte pönö cæbo adinque
 woadäni, Wængongui tæi piñængä inte mänömaï
 cæcampa, ante botö emöwo ante inguipoga tömäo
 apænedäni do eñencädänimpa, ante cætabopa.”
 Wængongui mänömainö ante Padaönö ingante
 apænecantapa, ante yewæmongatimpa. ¹⁸ İninque

Wængonguī, Adocanque ingante godō waadete ñimpo cæcæboimpa, äninque tömengä ingante do godō waadete ñimpo cæcampa. Wæætē wacä ingante guiquënē, Godō cæbo ate mīmō ömædengä bacæcäimpa, äninque Wængonguī tömengä ingante do cæcä ate edæ mīmō ömædengä bate wæcampa.

¹⁹ Mänömainö ante yewæmōmo adinque bitō wabänö iīmaī anguīmi, ante awædō. “Iñæmpa mōnitō Wængonguī nänö änö ante Baa änāmaī iñömōnite tömengä, Minitō beyænque impa, ante quīnante pūinte angää.” Mänömainö ante ämitawoo.

²⁰ Bitō iñæmpa önōmique inōmi inte Wængonguī ingante wæætēdō wæætē ämii. Nē badongä ingante tömengä nänö nē badōninca incæ dicæ, “Botō imote quīnante mänömaī badōwēmii,” ante dicæ anguīi.

²¹ Nē bædongä iñömō daibo pancaiya æninque waa pōnī wamoncade bædinque ado daibo pancaiya æninque önonque ewenguincade bæyongante æcänö nē bædingä ingante Baa anguingää. Nē bædongä iñömō nē änogä inte bæcampa. Edæ Baa anguīmii.

²² Wængonguī nänö nē pūināni iñömō tömēnāni nāni ömæe ewente wæquinque wīwa cæyōnānite tömengä piyænē cædinque wantæpiyæ pänāmaī inte ee ongongantawo. Iñæmpa tömengä nänö pūimāmo ante adinque do wæcædänimpa, ante cædinque ayæ tömengä nänö tæi piñæmāmo ante edonque acædänimpa, ante cædinque Wængonguī mänömaī ee ongongä apa anewēe. ²³ Ayæ wæætē, Botō waadete godō waa cæbo ænāni inte edæ tömēnāni iñömō botō ñäo bai botō emōnō ante acædänimpa, ante cædinque Wængonguī mänömaī

pänämaï inte edæ ee cæcampa. Wæætë, Tömënanï ñäö iñömö quëwencædänimpa, ante tömengä godö badongä ate tömënanï ñäö bai ëmönänipa. ²⁴ Edæ möni oodeocabo iñömönite mïnitö oodeomïni inämaï iñöminite Wængonguï mönö tömämö imonte mänömaï cæcæte ante aa pegacäimpa. ²⁵ Wængonguï iïmaï angampa, ante Ootea wodi yewæmongacäimpa.

“Botö guidënanï inämaï iñönänite botö wæætë,
 Botö guidëmïni, ante apænecæboimpa.
 Onquiyængä botö në waadedämaï ingaingä
 iñongante botö wæætë,
 Botö në waadebi imipa, ancæboimpa.

²⁶ Ayæ, ‘Botö guidëmïni inämaï iminipa,’ ante botö ongonte äñömö adoyömö ongöningue botö wæætë edæ, ‘Botö Wængonguïmo në Quëwëmo wëmïni iminipa,’ ancæboimpa.”

Ante adocä Wængonguï nänö änö ante yewæmongacäimpa. ²⁷ Idægoidi inänitedö ante yedæ äningue Itaiya wodi iïmaï apænegacäimpa. “Gäwapæ wedeca ëmönaïcoo nanguï pönï öñö bai idægoidi adopodäni nanguï pönï inäni incæte pancadäniya guiyä wææntodönï bai mänimpodänique quëwencædänimpa. ²⁸ Edæ Wængonguï, Inguipoga quëwënäni inänite apænte äningue botö angainö bai do edæ cæcæboimpa, ante në apænegaingä inte tömengä adocä, Idæwaa, ante quingæ pönï edæ iinque cæcæcäimpa,” ante Itaiya wodi yewæmongacäimpa. ²⁹ Adocä Itaiya wëënë iïmainö ante nänö apænegaïnö bai impa.

“Mönö Awënë në Tæiyæ Awënë tæi piñænongä inte dodäni inänite, Mïnitö pæinänï yebænte nanguï inäni bacædänimpa, ante

cædinqe pancadäniya inänite ata cæpocä
 quëwengadänimpa. Mänömaï ante cædämaï
 ingä bai,
 mönö wæætë Todömä quëwengainäni bai dæ bad-
 inque Gömoda näni quëwëñömö dæ ba bai
 mönö adobai edæ dæ bacædömöimpa,” ante
 nänö angainö bai impa.

*Idægoidi adobai pönëninque quëwenguënänäni
 inänipa*

³⁰ Ininque æbänö ante anguii. Oodeo inämaï
 inäni guiquënë, Nö entawëmöni bacæmönimpa,
 ante änämaï ingadänimpa. Incæte Wængongui godö
 cæcä beyænque tömënäni wede pönëninque wede
 näni pönënö beyænque Wængongui ayongä nö
 entawënäni do badänipa. ³¹ Idægoidi guiquënë,
 Nö cædäni, ante möni wææ angainö beyænque
 nö entawëmöni bacæminimpa, ante në angainäni
 inte eyepæ cædämaï inänipa. ³² Quinante eyepæ
 cædämaï inänii. Tömënäni wede pönënamäi
 inäni inte wæætë edæ, Mönö nanguï cædinqe
 nö cæmöni bacæmönimpa, äninque oda cæte
 näni pönënö beyænque dicaboga tee tëwate bai
 cædinqe eyepæ cædämaï ingadänimpa. ³³ Edæ do
 Wængongui beyæ yewæmongatimpa.

“Aquënë quëwënänii. Botö Codito ingante Tiöno
 näni quëwëñömö dica bai gö cæbo gongængä
 adinque edæ

waodäni dicaboga tee tëwate bai pönënamäi inäni
 inte tæ go wææncædänimpa.

Tömengä adocä ingante në pönengä guiquënë
 cöwë edæ guingo imönämaï inte
 quëwencæcäimpa,”

ante yewæmongatimpa.

10

¹ Botö tönĩñamĩni eñeedäni. Idægoidi quëwencädänimpa, ante botö mimönë nanguĩ aĩnente wædinque Wængonguĩ ingante apænedinque botö, Bitö æmi beyænque quëwencädänimpa, ante cöwë apænebopa.

² Wængonguĩ beyæ nö cæcæimpa, ante cæĩnente wädänipa, ante nāwangä impa. Incæte tømēnāni, Wængonguĩ beyæ nö cæcæte ante æbānō cæquĩi, ante eñēnāmaĩ ĩnāni inte önonque cæte wädänipa. Botö, Mänömaĩ impa, ante nē apænebo ĩnōmo ĩmopa. ³ Edæ Wængonguĩ pönö badongä ate mönö tømengä ayongä nö entawēmö bamompa, ante eñēnāmaĩ ĩnāni inte idægoidi ĩñömö, Nāmā mönö cädö beyænque nö cæmö bacæimpa, ante cædinque edæ oda cægadänimpa. Mänömaĩ cædinque tømēnāni Wængonguĩ nānō nö cægainō ante edæ Baa angadänimpa. ⁴ Nö cæmö bacæte ante Wængonguĩ nānō wææ angainō ante eñente cæquēnēmö inte mönö tømāmö wĩi eyepæ inte wægamöimpa. Mänömaĩ inte wæyömonte Codito ĩñömö, Mini pönencabo Wængonguĩ ayongä nö entawēmĩni bacæmĩnimpa, ante cædinque mänĩnō Wængonguĩ nānō wææ angainō ante tømānō ante ĩinque cægacäimpa. ĩnĩnque tømengä mänömaĩ ĩĩnque cæcä adĩnque Wængonguĩ mönö ĩmonte wæætē wææ änāmaĩ ingampa.

⁵ ĩĩmaĩ cæedäni, ante botö wææ angainō eñente cædinque nö cädäni badänipa, ante Möĩtee wodi ĩĩmaĩ ante yewæmongacäimpa. “Nē eñente cæcä ĩñömö tømengä nānō eñente cädö beyænque

quëwencäcäimpa,” ante yewæmongacäimpa.
⁶ Wæætë, Mönö wede pönencabo æbänö cæte
 Wængonguï ayongä nö entawëmö imöö, ante iïmaï
 ante adocä yewæmongacäimpa. “Bitö, ‘Æcänö
 öönädë æi añete wæænguingää,’ ante nämäneque
 änämaï ie.” Mänömaï ante tömengä, Codito ingante
 æi añete wææncæte ante mönö pönënamäi
 ingäimpa, ante ancæte ante yewæmongacäimpa.
 Iñæmpa Codito pönämaï ingampa diyæ æite
 mäwæmi wæænguingää. Dobæ edæ inguipoga
 pongacäimpa. ⁷ “Ayæ, ‘Æcänö tadömengadæ wæi
 añete ænguingää,’ ante änämaï ie.” Iñæmpa Codito
 ayæ öñongampa diyæ wæite mämi æænguingää.
 Edæ Codito dobæ ñäni ömæmonte quëwengampa.

⁸ Iñinque, Mönö wede pönencabo æbänö nö cæmö
 bamöö, ante æbänö ante yewæmongacäi. Edæ,
 Wede pönengäimpa, ante mönitö apænemöni
 mini eñënine ante adode ante iïmaï ante
 yewæmongacäimpa. “Wængonguï nänö nö änöne
 iñömö edæ bitö weca eyequei pönï ënëpa. Edæ bitö
 önöne tedeyömi bitö mimöno pönëñömi tömengä
 nänö nö änöne edæ adoyömö pönï ënëpa.” ⁹ Æbänö
 cæte quëwenguïi, ante iïmaï ante ënëpa. Itota Codito
 Tæiyæ Awënë ñongä ingampa, ante bitö önönëca
 apænedinque, Itota Codito wænte öñöñongante
 Wængonguï angä ñäni ömæmongacäimpa, ante
 bitö mimöno pönëmi adinque tömengä ængä
 beyænque quëwencæbiimpa, ante adode incæ
 ënëpa. ¹⁰ Mimöno edæ wede pönëninque mönö
 Wængonguï ayongä nö entawëmö bamompa.
 Mänömainö ante wede pönëmopa, ante önönëca
 apænëyömonte tömengä ængä beyænque mönö

quëwëmompä.

11 Codito ingantedö ante apænedinque, “Tömengä ingante në wede pönengä iñömö tömengä edæ guingo imönämaï incæcäimpa,” ante Wængonguï angä ëñente yewæmongadänimpa.

12 Edæ mönitö oodeomöni iñömönite mïnitö wæætë oodeomïni inämaï iñöminite mönö tömämö imonte adinque mönö Awënë iñömö edæ, Adoyömö pöni imïnipa, ante acampa. Ìinque tömengä adocä tömämö Awënë inongä ingampa. Ayæ tömengä ingante aa pemö ëñëninque tömengä iñömö edæ tömämö imonte nanguï pöni pönö cæcä æmompä.

13 Ìïmaï ante Wængonguï beyæ ante yewæmongatimpa. “Mönö Awënë ëmowo ante apænedinque aa pedäni ëñëninque mönö Awënë iñömö edæ tömënäni tömänäni inänite ængä beyænque quëwencædänimpa.” 14 Ìinque tömengä ingante në pönënämaï inäni iñömö ædö cæte tömengä ingante aa pequïnänii. Ayæ tömengä ëmowo ante ëñënämaï inäni iñömö tömengä ingante ædö cæte pönenguïnänii. Ayæ tömengä ëmowo ante wadäni gote apænedämaï iñönäni tömënäni ædö cæte ëñenguïnänii. 15 Ayæ edæ wadäni da godönämaï iñönäni në apænequënënäni wæætë ædö cæte gote apænequïnänii. Ìïmainö ante edæ Wængonguï beyæ ante yewæmongatimpa. “Tömengä waa pöni nänö cægäinö ante në watapæ apænedäni iñömö tömënäni nani apænecæ gote cægöniwa iñömö edæ waa pöni ëwadänipa,” ante nani yewæmonte angäinö bai impä. Edæ në apænecæ godäni inänite Wængonguï waa acampa.

16 Mönö Awënë ingantedö ante watapæ

apænedäni eñëninque idægoidi pancadäniya Ao angadänimpa. Pancadäniya guiquënë Baa angadänimpa. Tömënäni mänömainö nāni cædinö ante Itaiya wodi iimaï ante yewæmongacäimpa. “Awënë Wængongui eñëmi. Mönitö apænemöni tömënäni nāni eñënö ante edæ æcānö eñente pönengää. Iñæmpa nē pönengä iñömö edæ dæ angä awædö,” ante yewæmongacäimpa. ¹⁷ Iñinque gode änāni ate nē eñënānique wede pönënāni badänipa. Ayæ Codito nānö änönö ante gode ante apænedäni beyænque nē eñënāni badänipa. ¹⁸ Iñinque botö, Mäninö ante idægoidi gobæ ongönänipa diyæ eñënāmaï inguinānii, ämopa. Do eñënānitapa, ante edæ iimaï ante Wængongui beyæ yewæmongatimpa.

“Nē apænedäni inguipoga tömäo gote tededäni eñënänipa.

Waadäni inguipoga nāni quëwenganca quëwëñönānite mäninö tömënäni nāni apænedö ante do eñënänipa,” ante yewæmongatimpa.

¹⁹ Ayæ wæætë, Idægoidi önömonca eñëninque ömæcadäni inänipa diyæ eñënāmaï inguinānii. Do eñënānitapa. Edæ Möitee wodi incæ iimaï ante yewæmongacäimpa.

“Wadäni önönānique iñönānite botö godö waa cæbo adinque

mīni idægocabo wæætë, Mönitö imönite wīi pönö cæbii, ante pīinte wæcæminimpa.

Ayæ wadäni ocai ömæcadäni iñönānite botö godö waa cæbo adinque mīnitö wæætë nē pīinte amīni bacæminimpa,”

Ante cæcæte ante Wængonguī pönö cægacäimpa.
 20 Itaiya wodi guiquënë Wængonguī beyæ ante
 guiñenämaï inte apænegacäimpa.

“Wadäni iñömö botö imote ante diqui diqui
 minämaï inäni incæte do adänitapa.

Ayæ, Wængonguī ingante ainëmönipa, ante änämaï
 iñönänite, Botö imote aedäni, ante botö
 odömömo adänitapa.”

21 Äninque Itaiya wodi idægoidi inänitedö ante
 apænedinque, “Eññenämaï inte Baa änönäni
 iñönänite botö, Pöedäni, ante tömäa itæde önompo
 compo compo cæbo incæte pönämaï inänitapa.”

11

*Idægoidi pancadäniya inänite Wængonguī apænte
 cængä*

¹ Ininque botö iïmaï ante apænebopa. Tömengä
 quinäni iñönänite Wængonguī dicæ idægoidi inänite
 Baa angantawogaa. Iñæmpa botö adobo näwä
 idægobo imopa. Abadäo wodi pæïmo inömo inte
 botö edæ Beencaminö wodi pæïmo inömo inte
 tömengä pæinäni tönö adocabobo tömömo inömo
 imopa.

² Idægoidi botö quinäni incädänimpa,
 äninque Wængonguī wëenëñedë pönï mönitö
 imönite adinque do apænte ængacäimpa. Ininque
 mönitö tömengä nänö në agaïmöni iñömönite
 tömengä cöwë Baa änämaï ingacäimpa. Idægoidi
 inänite piinte äninque Ediya wodi Wængonguī
 ingante apænegacäimpa, ante æbänö yewæmonte
 ongompa, ante mïnitö adämaï imïnitawo.

³ “Awënë eññemi. Bitö beyæ në apænedäni inänite
 wænöninque idægoidi godömenque cædinque,

Wængonguī quī, ante nāni iya tāinca bæ tadinque edæ wido cædānitapa. Ayæ botō adoboque inte edæ ayæ quēwēñōmote botō imote wænoncæte ante cædāni wæbo abi.” ⁴ Āñongante Wængonguī, “Īñæmpa botō tiæte mīdo ganca mānimpodāni inānite, Botō quīnāni inānīpa, ante wææ gompobo quēwēnāni apa quēwēe. Wadāni nāni, Mōnitō wængonguī Baado ingampa, nāni ānongā weca botō quīnāni ĩñōmō edæ da guicapodāmaī inānīpa cæbii,” angacāimpa, ante nāni yewæmongainta adāmaī ĩmīnitawoo.

⁵ Nōwo ĩñōmō edæ adobaī impa. Idægomōni mōni cabo incæ mēa pōnī ĩmōni inte Wængonguī ingante Baa ānāmaī ĩñōmōnite tōmēngā mōnitō ĩmōnite waadete pōnō cædinque, Botō quīmīni ĩmīnīpa, ante apænte ængampa. ⁶ Īnīnque, Wængonguī waadete pōnō cædinque apænte ængampa, ante adīnque tōmēmonque waa cæmō beyæ ædō cæte Wængonguī apænte ænguingāā. Īñæmpa tōmēmonque waa cæmō beyæ Wængonguī mōnō ĩmonte apænte ængā baī, Wængonguī waadete pōnō cæcampa, ante ædō cæte anguēnē ĩ. Wæætē edæ tōmēmonque waa cæmō beyæ Wængonguī apænte ængā baī tōmēngā adocā ædō cæte nānō waadete pōnō cædō beyænque mōnō ĩmonte apænte ænguēnengāā. Īñæmpa Wængonguī waadete pōnō cædinque apænte ængā ĩnīnque, Tōmēmonque waa cæmōmpa, ante ædō cæte anguīī.

⁷ Mānōmaī ĩ ĩnīnque æbānō ante anguīī. Edæ idægoidi tōmēnāni nāni nangūī æīnēnō ante dīqui dīqui mīnte ænāmaī ĩñōnāni mōnō ĩñōmō Wængonguī nānō nē apænte ængāīmō ĩmō ĩñōmō

edæ do æntamompa. Nē ænāmaī ināni inānite Wængonguī ee ayongante mīmō ömædēnāni bagadānimpa. ⁸ Iīmaī ante Wængonguī beyæ nāni yewæmongainō bai ingatimpa. “Tömēnāni inānite Wængonguī godō cæcā ate möwo möinente bai wædāni inte tömēnāni awinca emōnāni incæ ñowo ganca adāmaī inte wædānipa. Önōmonca emoncadāni incæ edæ eñēnāmaī inte wædānipa,” ante yewæmongatimpa. ⁹ Ayæ awēnē odeye Dabii wodi Wængonguī ingante apænedinque iīmaīnō ante apænegacāimpa.

“Wængonguī eñēmi. Waodāni nāni wænguinque gote ææmæ bedāni bai cædinque iīnāni iñömō edæ wapiticæ nāni towēnōnō ante gote towēnānipa. Incæte bitō godō cæbi ate tömēnāni nāni towēnō beyæ edæ wæncædānimpa, ämopa.

Tömēnāni tee tēwate bai oda cæte wæyönāni bitō godō pämi wæcædānimpa, ämopa.

¹⁰ Bitō godō cæbi ate tömēnāni awinca edæ mæ māmōnte bai bamōninque adāmaī incædānimpa.

Ayæ teēmē mongæninque bocæ ñongænte cōwē wæcædānimpa, ämopa,”

ante awēnē Dabii wodi Wængonguī ingante apænegacāimpa.

Idægoidi ināmaī ināni quēwēnānipa, ante

¹¹ Ñowo wæætē iīmaī ämopa. Do oda cædāni incæ idægoidi iñömō dicæ æmæwo tæ go wæænguīnāni inānitawogaa. Iñæmpa ayæ ate ængæ gantidinque tömēnāni nē quēwenguīnāni inānipa. Incæte Wængonguī, Tömēnāni eñēnāmaī

cædāni beyæ wadāni quëwënāni adinque idægoidi wæætë, Mönö quëwengade impa, ante pïinte wæcædānimpa, ante godö cæcä ate idægoidi edæ oda cægadānimpa. ¹² İninque idægoidi ëñënamāi cædinque ænāmāi ināni beyæ mönö inguipoga tōmāmæ mönö quëwencabo wæætë edæ nanguï pōnī æmompā. Tömënāni ænāmāi inte ömæpodāni wædāni beyænque mīnitö idægomīni ināmāi imīni wæætë nanguï pōnī æmīnīpa. İninque idægoidi nāni quëwenguimāmo iincayæ ate eyepæ pōnī ænāni ate edæ æbānö baquīi. Edæ idægoidi iincayæ ate eyepæ pōnī ænte entawënāni beyænque mönö waocabo tōmāmö godömenque nanguï pōnī ænte entawengæimpa.

¹³ Idægomīni ināmāi imīni imīnite apænebo ëñëedāni. Botö imote Codito, Idægoidi ināmāi ināni inānite apænecæbiimpa, ante da godongä gotabopa. İninque botö, Mīnitö imīnite nē apænebo inte tobopa, ante nanguï tedebo. ¹⁴ Edæ, Idægoidi ināmāi ināni incæ do quëwënānīpa, ante botö tedebo ëñente wædinque botö guidënāni idægoidi wæætë, Mönitö adobāi quëwencæmönimpa, ante pïinte wæcædānimpa, ante tedebo. Ayæ adodāni pancadāniya godömenque pönëninque quëwencædānimpa, ante cædinque botö edæ nanguï tedebo.

¹⁵ Idægoidi inānite Baa ante wido cædinque Wængonguï wæætë inguipoga tōmāmæ quëwëmö iñömönte piyænë cædinque edæ waadete pönö cægacāimpa. İninque tōmengä iincayæ ate idægoidi inānite Ao ante ængä ate edæ æbānö baquīi. Māniñedë ate edæ mönö wænte öñönte bai inömö

inte edæ mönō ñāni ömæmonte quëwengæimpa.
 16 Iimaï ante pönengæimpa. Päo pancaboga
 pancæte bai wædænque ināni inte tāno nāni
 pönente quëwencabo iñömō tæiyæ waëmō ināni
 ïinque ïincayæ nāni pönente quëwencabo guiquënë
 päo babo bai adobai ināni inte tömënāni adobai
 tæiyæ waëmō inānipa, ante pönengæimpa. Tāno
 pönengaināni guiquënë tæcæguinto bai inönāni inte
 tæiyæ waëmō ināni ïinque edæ ïincayæ pönënāni
 guiquënë yæpænto bai inönāni inte adobai tæiyæ
 waëmō inānipa.

17 Odibowæ önonque pæwæ incæ wainca
 incacæimpa, ante cædinque waocā tömengä nänō
 mingaiwæ waa pönï incawæ adinque yæpængö
 nämænte godö önonque pæwæ yæpæntoga
 mine timongä aminipa. Idægoidi iñömō waocā
 nänō minte pæwæ bai iñönānite Wængongui
 pancadāniya inānite yæpængö wæi ñæmænte
 bai wido cæcā wædānipa. Tömënāni mänömaï
 wæyönāni bitö guiquënë önonque pæwæ yæpængö
 bai ïimitapa. Incæte Wængongui, Odibowæ
 yæpængoncoo bai tæcæguinto beyænque odæ yate
 bai pæte incacæimpa, ante odibowäa yæpæntoga
 godö mini tinte bai cædinque bitö ïimite waadete
 pönö cæcā ate bitö idægoidi beyænque müimi inte
 ongömipa. 18 Mänömaï i ïinque bitö wæætē edæ,
 Wængongui botö imote pönö cæcæte ante tömënāni
 inānite wido cæcampa, ante bitö nämä ængö cæcæte
 ante cædinque idægoidi inānite ante wii piinte
 ancæbiimpa. Iñæmpa tæcæguinto ëwa bai ināni inte
 idægoidi iñömō edæ bitö beyæ dicæ quëwënāniyaa.
 Wæætē edæ tæcæguinto ëwa bai ināni beyænque

bitö quëwëmpa, ante apænebo ëñëninque bitö pïimi ïinque, Mänömaï impa, ante täno pönëe.

¹⁹ ïinque bitö, “Odæ yacæimpa, ante cædinque godö mïne timönäni bai Wængongui botö imote pönö cæcæte ante cædinque idægoidi ïänite wæætë wido cæcampa,” ante pönëmitawoo. ²⁰ Bitö pönëno edæ näwangä impa. Incæte edæ tömënäni nani pönënämaï inö beyænque Wængongui tömënäni ïänite wido cægacäimpa. Bitö guiquënë wede bitö pönëno beyænque müimi inte ongömipa. ïinque bitö guïñente wædinque edæ nämä ængö cædämaï inte edæ, Botö waëmö imo beyæ cæcantapa, ante pönënämaï imäwe. ²¹ ïñæmpa näwä yæpængö bai ïäni ïänite Wængongui tapodämaï ïongä inte bitö önömique ïñömite dicæ ata cæpoqingäa.

²² ïinque, Wængongui në waadete cædongä incæ cöwë në apænte pangä ingampa, ante pönëe. Tömengä ïñömö në oda cædäni ïänite pangampa. Wæætë bitö në waadete cædongä nempo quëwëmi ïinque tömengä bitö imite waadete cæbaingampa. Incæte tömengä nempo wïi quëwëmi ïinque tömengä wæætë bitö imite edæ wæi ñæmænte bai wido cæbaingampa. ²³ Idægoidi guiquënë, Idæwaa pönënämaï inte awædö, ante ocæ ëmænte pönäni adinque Wængongui në tæi piñænongä inte tömënäni ïänite wæætë ado awæ yæpæntoga godö mini timonte bai pönö cæcä ate müinäni edæ ongömaïnänipa. ²⁴ Waodäni waa incawæ yæpængö nämænte önönque pæwæ yæpæntoga godö nani mïne timönö bai Wængongui wïi adobai cæcampa. Wæætë edæ bitö önönque pædiwæ yæpængö bai ïñömite tömengä waadete pönö

nämænte bai cædinque, Nāwā idægobi babipa, ante waa pæwæ yæpæntoga godō mīni tīmonte bai cæcampa. Bitō imite mǎnōmaī waa cæcā inongā inte tōmengā idægoidi inānite æbānō godōmenque waa cæbaingāā. Tōmēnāni iñōmō waa pōni pæwæ yæpængoncoo tōmengā nānō wæi ñæmæncoo bai inte wæyōnānite adowænē yæpæntoga godō mīne tīmonte bai cædinque tōmengā tōmēnāni inānite, Nāwā idægomīni inte mīnitō wæætē mīimīni ongoncæmīnīmpa, ante do cæcæcāīmpa.

Idægoidi iñque bayonte quēwencædānīmpa, ante

²⁵ Iñānāni eñēedāni. Mīnitō nāmā ængō cædāmaī incæmīnīmpa, ante cædinque botō wēēnēñedē mīni eñēnāmaī ingainō ante edæ wææ āmopa. Mīnitō idægomīni ināmaī imīni mīni pōnencabo eyepæ pōni mīni yebænganca idægoidi iñōmō ñōwo mīmō ōmædēnāni inte wædōnāni inte edæ māninganca cōwē mīmō ōmædēnāni inte wæcædānīmpa. ²⁶ Iñcayæ ate guiquēnē idægoidi tōmānāni quēwenguīnāni inānīpa. Edæ iīmaī ante yewæmonte ongompa.

“Mōnō ñā cæyænte bai tee mōnete bai wæwēñōmonte nē Ñīmpo Cæcā iñōmō Tiōno iñōmō quēwente poncæcāīmpa.

Aacobo wodi pæināni Wængonguī ingante eñēnāmaī cæte quēwēnāni adinque nē Ñīmpo Cæcā iñōmō tōmēnāni nāni eñēnāmaī entawēnō wadæ cæcā ate tōmēnāni wæætē eñēnte cæte quēwencædānīmpa.

²⁷ Iñique wēnæ wēnæ nāni cægainō ante wadæ cæte wido cædinque Wængonguī tōmēnāni inānite iīmaī angampa.

Botö pönö cæbo ate mīnitö Ao ämīni īnīnque
edæ mōnō godongāmæ waa cæte
quēwengæīmpa, ante Wængonguī
angampa,” ante yewæmongadānīmpa.

28 Codito ingantedö ante watapæ ēñente
pönēnīnque mīnitö idægomīni īnāmaī īmīni do
quēwēmīni beyæ idægoidi wæætē Wængonguī
īngante pīinte adānīpa. Incæte tōmēnāni mæmæīdi
īnānite nē apænte ængaingā inte Wængonguī
wæætē mæmæīdi beyænque ante pönēnīnque
ñōwodāni īnānite waadete pōnengampa. 29 Edæ
waomö īmonte quincoomē pōnongā æñōmonte
Wængonguī adodö ö ænāmaī ingampa. Ayæ
adobaī waomö īmonte aa pedīnque tōmengā wadö
ante änāmaī inte edæ adodö ante edæ cōwē aa
pecampa. 30 Mīnitö wēēnēñedē ēñēnāmaī cæmīni
īncæte Wængonguī īñōmō idægoidi ēñēnāmaī
cædāni beyæ mīnitö īmīnite wæætē waadete
cædīnque pönö ata cæpocā quēwēmīnīpa. 31 Ayæ
adobaī mīnitö īmīnite pönö waadete ata cæpocā
quēwēmīni beyæ idægoidi ēñēnāmaī cædāni
īñōnānite Wængonguī ñōwo tōmēnāni īnānite adobaī
waadete cædīnque godö ata cæpocā quēwēnānīmpa.
32 Īnīnque tōmengā, Mīni waocabo tōmāmīni īmīnite
botö waadete cædīnque pönö ata cæpocæboīmpa,
ante cædīnque, Mīni ēñēnāmaī cæcabo īnōmīni
inte mīnitö nāmā eö toyænte aamö cædāmaī
īncæmīnīmpa, ante tōmāmö īmonte ñā cæyænte
baī cæcā wæcongāmōīmpa.

33 Īnīnque Wængonguī nanguī pōnī waadete
entawēnongā īñongante tōmengā nānō pönö cædōnō
ante mōnō ædö cæte tee mante aquīī. Tōmengā

tömancoo do adongä inte nanguï pöni ëñëongä inte cæcä ingänö anguënë. Tömengä edæ, Æbänö i, ante do againgä inte edæ, Æbänö cæquïi, ante do apænte añongante mönö waocabo wæætë tömengä nänö cædö ante ædö cæte ëñenguïi. Tömengä ædönö ponte ædönö gocää, ante pönente wædinque mönö tömengä önöwa amompa diyæ taadö aquïi. ³⁴ Edæ iimaï ante nani yewæmongainö bai impa. “Mönö Awënë æbänö pönengää, ante pönente wædinque æcänö ëñengää. Ayæ, iimaï cæquï impa, ante mönö tömengä ingante edæ ædö cæte odömonte apænequïi. ³⁵ Wængonguï ingante æcänö do godongä inte wæætë, Bitö debe imipa, ante anguingää. Iñæmpa tömengä ingante godömompa diyæ debe inguingää,” ante Itaiya wodi nänö yewæmongainö bai impa. ³⁶ Edæ tömengä nänö pönongaincooque inte edæ tömancoo ongompa. Mönö waocabo iñömö tömengä badongä beyænque tömengä quimö baquinque ongömompa. Ayæ adobai edæ tömengä badongä beyænque tömancoo tömengä quincooque edæ baquinque ongoncoopa. Edæ tömengä adocanque pöni ñäö entawente edæ cöwë tæi ëmoncæcäimpa. Mänömaï impa, ante mönö, Amëë, ante apænecæimpa.

12

Wængonguï quimö imompa, ante cæte quëwengæimpa

¹ Botö töninamini ëñëedäni. Wængonguï waadete pönö waa cæcä ængaimini inte minitö iimaï cæedäni, ante botö nanguï ämopa. Wængonguï

quī, ante baō pædæ godönäni waa ængä bai mīnitō adobaī edæ, Wængonguī quīmōni imōnipa, ante mīimīni inte edæ tōmengä ingante nämä pædæ godōmīni ængædäni. Mänōmaī cædinque mīnitō tōmengä önōwa inō mīni ædæ wæænte nanguī cæquënēnō ante edæ do cæmīni incæmīnimpā. Mänōmaī godōmīni ænīnque tōmengä wæætē edæ, Botō ayōmo tæiyæ waēmō pönōmīni æmopa, ante tocæcāimpā. ² Inguipogaque ante pōnente mīni cægāinō ante ñōwo ñimpo cædinque mīnitō mīimīni mīni quēwengūnque ante edæ ocai mīnīnque encate bai nōingä ante pōnēedāni. Mänōmaī cædinque mīnitō, Wængonguī waa pōnī nänō änōnō ante, Æbänō i, ante ædæmō ēñēnīnque, Tōmengä nänō änō iñōmō eyepæ pōnī impā, ante ēñencæmīnimpā. Mänīnō ante ēñente cæte quēwēmō inte mōnō tōmengä tōnō godongāmæ waa tocæimpā.

³ Wængonguī waadete pōnō cæcā ate botō nē apænebo badīmo inte iīmaī ante apænebopa. Mīnitō nämä pōnēnīnque, Ñænæmo imopa, ante pōnēnāmaī iedāni. Wængonguī pōnō badongä ate mīnitō wede pōnēmīni badīmīni inte mīni wede pōnenganca māningancaque pōnēnīnque iīmainō ante pōnēedāni. Botō önōmoque bai inōmo imopa, ante ocai encamīni inte tōō pōnī pōnēedāni. ⁴ Mōnō baō adoyonque pōnī ēñamō incæte wīi adodonque mōnō cæquënēnō ante ēñamompā. Īnīnque mōnō aquīnō ante awīnca ēmōnīnque mōnō dao dao goquīnō ante önōwa ēwamompā. Ayæ wadō mōnō cæquīnō ante wayō ēñādinque mōnō wæætē wadō mōnō cæquīnō ante wayō ēñādinque wayō wayō mōnō ēñacoo ēñamompā. ⁵ Īnīnque wayō wayō

ēñamō incæ mōnō baō pæ pagænguincōo adoy-
onque ī baī mōnō adobaī Codito nempo mōnō
quēwencabo nanguī pōnī imō incæte adocabomō
inōmō Imompa.

⁶ Īninqe mōnō adocabomō iñōmonte Wængonguī
waadete pōnō cædinque mōnō imonte wadō wadō
mōnō cæquinō ante tōmānō pōnongā æmompā.
Īninqe mōnō tōmengā da pōnongā mōnō ænganca
edæ adoganca wadō wadō cæmompā. Mānōmaī
ænte cædōmō iñōmonte pancamīniya imīnite
Wængonguī pōnō apæneca ēñēninqe mīnitō
tōmengā beyæ nē apænemīni do badinque wede
mīni pōnenganca apæneedāni. ⁷ Wæætē wamīni
imīnite Wængonguī pōnō cæcā æninqe mīnitō
wadāni inānite nē cæmīni do badinque wadāni
beyæ cæcæmīnimpa. Wæætē wamīni imīnite
tōmengā pōnō cædinque odōmonte apæneca
ēñēninqe mīnitō nē odōmonte apænemīni do
badinque odōmonte apæneccæmīnimpa. ⁸ Ayæ
wæætē wamīni imīnite Wængonguī pōnō waadete
apæneca ēñēninqe nē waadete apænemīni
badinque mīnitō iñōmō wæntæye inte wædāni
inānite ædæmō apænemīni ēñēninqe tōmēnāni
wæætē edæ wampo pōnēninqe tæī piñænte
cæcædānimpa. Wamīni imīnite Wængonguī
pōnongā æninqe nē nēnempomīni badinque
mīnitō, Tōmēmōni quī, ante wædāmaī inte wæætē
wadāni nāni ænguēnēnō ante eyepæ godōmīni
æncædānimpa. Wamīni imīnite Wængonguī pōnō
angā ēñēninqe mīnitō wæætē awēnēidi baī
nē āmīni badinque wadāni inānite nōingā cæte
awēnēidi baī ancæmīnimpa. Wamīni imīnite

Wængongui ædæmō waadete pönō waa cæcä æninqe mīnitō wæætē ædæmō waadete cæmīni do badinque wadāni inānite ædæmō waadete godō waa cædinque edæ wædāmaī inte tocæmīnimpa.

Codito nempo quēwēninqe iūmaī cæcæimpa, ante

⁹ Botō waadete pönēmopa, ante tademīni ininqe mīnitō nōinō cæte waadete pönencæmīnimpa. Wiwa mīni cædōnō ante pīninqe wido cæedāni. Wæætē, Quinō waa cæquīi, ante adinque mānīnō ante ænte mīnitō mīmōnē ædæmō entawēninqe cōwē waa cæte quēwēedāni. ¹⁰ Mōnō waadete pönencabo imopa, ante pōnēninqe wacā ingā wacā ingā waadete pōnente cæedāni. Wadāni ñænænāni inānīpa, ante mīnitō tōmēnāni inānite ængō cæte baī cædinque wæætē, Botō wædāmo imopa, ante nāmā ængō cædāmaī iedāni.

¹¹ Tæi pīñænte ewocadinque mōnō Awēnē beyæ ante wæntædāmaī inte cæedāni.

¹² Watapæ bacæimpa, ante pōnēninqe tocæmīnimpa. Caate wæwēmīni incæte wæntæye badāmaī inte ee cæedāni. Ñimpo cædāmaī inte Wængongui ingante cōwē apæneedāni.

¹³ Wængongui quīnāni ænguēnēnāni inte wædāni adinque mīnitō māincoo wæætē nēnempomīni æncædānimpa. Ayæ, Botō oncōnē pō guiite cænte mōedāni, ante wadāni inānite waadete cæedāni.

¹⁴ Mīnitō imīnite nē pīinte cædāni iñōnānite mīnitō tōmēnāni inānite waadete godō apæneedāni. Edæ tōmēnāni inānite waadete apænedinque, Wængongui mīnitō imīnite waa cæcæcāimpa, ante apænedinque wæætē pīinte änāmaī iedāni.

¹⁵ Nē watapæ todäni tönö godongämæ watapæ toedäni. Nē Ca wædäni tönö mīnitō godongämæ Ca ca wæedäni.

¹⁶ Mönö pönencabo imopa, ante adoyömö pönente quëwëedäni. Önönänique nāni nē änönāni tönö godongämæ cædinque, Botō ñænæmo imopa, ante pönenämaï iedäni. Mīnitō, Wadäni pönömenque ocai encayönāni botō godömenque nanguï pönï encabo imopa, ante nāmā ante pönenämaï iedäni.

¹⁷ Wadäni mīnitō imīnite pönö wënæ wënæ cædäni adinque mīnitō wæætë godö wënæ wënæ cædämaï iedäni. Ayæ, Quïnö waa cæquïï, ante tōmānāni nāni waa adönö ante adinque mīnitō mäninonque ante cædäni. ¹⁸ Eyepæ imīni inte mīnitō cæganca cædinque tōmānāni tönö godongämæ piyænë cæte quëwëedäni. ¹⁹ Botō nē waademīni ëñeedäni. Mönö Awënë beyæ iïmaï ante yewæmongatimpa. “Wënæ wënæ cædäni adinque botō wënæ wënæ nāni cædinö beyæ ante nē apænte panguënëmo inte tōmëmo eyepæ wæætë godö cæbo wæcædänimpa, ante Awënë angampa,” ante yewæmonte ongopa cæmīni. Mīnitō imīnite pönö wënæ wënæ cædäni wæmīni ïnīnque edæ wæætë godö cædämaï ee aedäni. Edæ nē äingä bate pänongä inte Wængonguï incæ pancæcäimpa. ²⁰ Wæætë, “Bitō imite nē piïnte cædongä incæ gæwænte wæcä adinque godömi cængæ. Gue ænente wæcä adinque godömi becæ. Edæ mänömaï waa cædinque edæ tōmengä guingo imonte nänö wæwenguinque bitō tōmengä ingante waa cæcæbiimpa,” ante Wængonguï beyæ yewæmonte ongö apa cæbii. ²¹ Tömënāni wënæ

wënæ nāni cædō beyæ oda cædāmaï inte wæætē
māninō ante wido cæte baï cædinque bitō waa
cædinque edæ tæï ëmonte gānā cæe.

13

¹ Gobiedōno awënē nempo waodāni ëñente cæte
quëwencædānimpa, ante Wængonguï incæ godō
gō cæcā beyænque gobiedōno awënēidi badānipa.
Edæ Wængonguï mānōmaï ante gō cædāmaï ingā
baï quingānō awënē inguënengāā. Edæ dæ
ancædōnimpa. Ìninqe gobiedōno awënēidi ìnānite
mōnō tōmāmō Ao āninqe ëñente cæcæïmpa.

² Ìninqe awënē ingante æcānō Baa ānaa tōmengā
nānō apænte pante wæquinque Wængonguï nānō
goncægāinō ante ëñēnāmaï inte edæ Baa angampa.

³ Nē waa cædāni guiquēnē awënēidi ìnānite waa
ate todinqe guïñēnāmaï ìnānipa. Wæætē wënæ
wënæ cædāni guiquēnē awënēidi ìnānite guïñente
wædānipa. Gobiedōno awënē ingante guïñēnāmaï
inte quëwencæboïmpa, ante bitō āmitawoo. Ìninqe
bitō guïñēnāmaï inte quëwencæte ante waa
cæcæbiïmpa. Waa cæbi adinqe tōmengā, Bitō
waa cæbi abopa, ante pōnō waa cæcā ìninqe bitō
guïñēnāmaï ìmaïmipa.

⁴ Botō ìmote nē cædongā inte mīnitō beyæ waa
cæcæcāïmpa, ante Wængonguï gobiedōno awënē in-
gante godō gō cæcā ongongampa. Edæ Wængonguï
ingante nē cæcā ìnongā inte tōmengā nē wënæ
wënæ cæcā ingante nō cæte nē panguënengā
ingampa. Ìninqe awënē yaëmē nē næægā inte
wīï ònonque næægampa cæbii. Wënæ wënæ cæbi
ìninqe edæ guïñente wæcæbiïmpa. ⁵ Ìninqe mōnō,

Pangä wæcæ wæ, äninge awënë ingante eñente cæcæimpa. Ayæ pangä wæmö incæ wii pangä wæmö incæ mönō mīmō nē entawente nāmā apænte änōmō inte mönō awënë ingante Ao ante eñente edæ nöingä cæcæimpa. ⁶ Wængonguī beyæ nē cædōnāni inte awënëidi iñōmō tōmēnāni nempo quēwēnāni inānite cōwē aadinge māninge cæte quēwēnānipa. Mänōmaī ī inique mīnitō, Awënëidi eyepæ æninge mōnitō beyæ cæcædānimpa, ante tōmēnāni nāni äinta pædæ godōmīni ænānipa.

⁷ Æcāmenque ingante cæquēnēmīni imīni inte mīnitō tōmānāni inānite mīni cæquēnenganca do godō cæmīni æncædānimpa. Awënë nempo quēwēñōmonte tōmengä eyepæ æninge mönō beyæ cæcæcāimpa, ante mīnitō awënë nānō äinta godonguēnēmīni inte do godōmīni ængæedāni. Waocä ingante mīnitō guiñente eñenguēnēmīni imīni inique tōmengä ingante guiñente eñeedāni. Waocä ingante mīnitō waa aquēnēmīni imīni inique edæ tōmengä ingante waa aedāni.

⁸ Wacä ingante mīni cæquēnēnō ante edæ ee ongōnāmaī inte godō cæmīni ængä ate abæ tawænte gocæbiimpa. Wæætē wacä ingä wacä ingä waadete mīni pōnenguēnēnō ante edæ godongāmæ cōwē waadete pōnenguēnēmīni imīnipa. Wadāni inānite nē waadete pōnengä iñōmō tōmengä iñōmō Wængonguī nānō, İimaī cæedāni, ante nānō wææ angainō ante do eñente cæcä ingampa. ⁹ Tömēmi nāmā bitō waadete pōnēnō ganca wacä ingante adoganca waadete pōnencæbiimpa, ante Mōitee wodi yewæmongacāimpa. Mānīne adodeque ante eñente cædique waocä Wængonguī nānō wææ angainō ante tōmānō do iinque cæcampa. Edæ, “Bitō

nänöogængä inämaï iñongante godö guëa mönämaï ie. Wacä ingante godö wænönämaï ie. Wacä nänö äadincoo adinque godö ænämaï ie. Wacä wænæ wænæ cæcä atabopa, ante godö babæ wapiticæ apænedämaï ie. Wacä qui ante æinente wædämaï ie.” Mäninecoo Wængongui nänö wææ angainecoo ante bitö waadete pönemi beyænque tömäne do iinque cætimpä. Ayæ quinemë godömenque wææ ante i mänine adobaï bitö waadete pönemi beyænque tömäne do iinque cætimpä. ¹⁰ Në waadete pönengä iñömö edæ wacä ingante cöwë wiwa cädämaï ingampa. Mänömaï beyæ në ædæmö waadete pönänanique Wængongui nänö wææ angainö ante iinque cædanipa.

¹¹ Iinque, Ñöwoyedë æbänö oo baquïi, ante do ëñëninque mïnitö waadete pönente quëwëedäni. Edæ wëenëñedë mä mönö wede pönëñedë mïnguipo mönö quëwenguimämo iñömö edæ mäniñedë edæ oo bacæ cädämaï ingatimpä. Ñöwo guiquënë, Oo pönï bacæimpä, ante pönente wædinque mïnitö möwocodë öñömini inte edæ ñäni ömæmöninque mïimïni quëwëedäni. ¹² Wëmö iñömö mönö wæwëmämo idæwaa edæ bapa. Mïnguipoga ñäo bai baquinque edæ oque pönente impä cæmöö. Wëmö iñonte mönö wænæ wænæ cædö æmæwo wido cædinque, mönö wæætë ñäo iñömö quëwëninque edæ wææ cæquincoo wëñate bai cædinque nämä wææ gompotawengæimpä. ¹³ Mänömaï cædinque mönö itæde quëwënömö inte nö pönï cæcæimpä. Baonique ante mönö cæinëwënö ante towënämaï inte mönö ti nämæ nanguï bete quidi quidi dowænämaï ingæimpä. Mönö wacä tönö godö guëa mönämaï, cængui

eyepæ cæninque godömenque nanguï cænāmaï ingæïmpa. Wæætedö wææte püinte cædāmaï inte mōnō, Wacā baï bacæboïmpa, ante püinte adāmaï ingæïmpa. ¹⁴ Wææte wææ cæquincoo entawente baï cædinque mīnitō nāmā wææ gompotawencæte ante cædinque mōnō Awēnē Itota Codito ingante entawente quēwēedāni. Ayæ baonque ante mīni cæinēwēnō ante wido cædinque, Æbānō cæte wēnæ wēnæ cæquīmoo, ante cæcæte ante wædāmaï iedāni.

14

Mīnitō tōniñadāni inānite püinte änāmaï iedāni, ante

¹ Wacā wīi ædæmō pōnengā incæte mīnitō, Mōnō pōnencabo ïmōmpa, ante pōnēninque tōmengā adocabocā nānō baquinque ämīni pongæedāni. Tōmengā nānō pōnēnō ante wæætedö wææte änāmaï iedāni. ² Pancadāniya wede pōnēnāni inte cænguï adinque, Nāwā cænguï ïmpa, ante guññēnāmaï inte quīēmē cænguï incæ edæ dobæ ade cænānīpa. Wadāni guiquēnē æmæ pōnente beyæ, Tōmāā baö baacā ïmpa, ante awente baï cædinque quingāmenque baö incæ cænāmaï inte onguipoiya pæcooque edæ cænānīpa. ³ Incæte tōmāā cænguï nē cænongā iñōmō onguipoiya pæcooque nē cænongā ingante püinte adāmaï incæcāïmpa. Wacā ingante, Bitō önōmique baï inōmi inte edæ awente cænāmaï ïmīpa, ante änāmaï incæcāïmpa. Ayæ wææte onguipoiya pæcooque nē cænongā guiquēnē baö nē cænongā ingante, Baacā apa cæwēe, ante apænte ante pūināmaï incæcāïmpa. Edæ nē cænongā ingante Wængonguï Ao āninque, Botō quīmi ïmīpa, ante do

ængampa. ⁴ Iñæmpa tömengä wacä awënë ingante nē cæcä iñongante bitö ædö cæte apænte ämii. Edæ tömengä awënë incæ, Waa cæbipa, angä wædinque edæ tömengä adiyæ tæi ongömaingampa. Wæætē adocä tömengä awënë, Wënæ wënæ cæbipa, angä wædinque edæ tæ go wææmaingampa. Incæte edæ tömengä mönö Awënë ingante nē cæcä iñongante mönö Awënë adocä incæ tæi piñænogä inte eyepæ cædinque edæ æænö gö cæcä tæi ongoncæcäimpa.

⁵ Ayæ wacä guiquënë, Pancaönaa godömenque waa eönæpa, ante cæcäimpa, ante pönëñongante wacä guiquënë, Tömää itædē önönæque impa, ante pönengampa. Ìninqe mönö pönencabo wacä wadö wacä wadö pönëmö incæte mönö tömämö iñömö edæ, Nämä botö pönënonque ante botö nö pönente cæcæboimpa, ante edæ mäninonque ante cæcæcäimpa. ⁶ Edæ, Pancaönaa godömenque waa eönæpa, ante nē pönengä guiquënë tömengä mönö Awënë ingante waa adinque mänömainö ante cæcampa. Pancaönaa wii godömenque waa eönæpa, ante nē pönengä guiquënë tömengä adobaï mönö Awënë ingante waa adinque mänömainö ante cæcampa. Baö nē cænongä guiquënë Wængongui ingante, Waa pönömi cæmopa, ante adobaï mönö Awënë ingante waa adinque cængampa. Baö ate nē awente cænämaï inongä guiquënë tömengä adobaï Wængongui ingante, Waa pönömi cæmopa, ante onguipoiya pæcooque cæninque mönö Awënë ingante waa adinque baö cænämaï ingampa.

⁷ Mönö pönencabo iñömonte æcämenque incæ nämä beyænque dicæ quëwengää. Dicæ nämä

beyænque wængää. ⁸ Wæætë edæ quëwëmö ïinque mönö Awënë beyænque quëwëmpa. Wæætë edæ wæmö ïinque mönö Awënë beyænque wæmpa. ïinque quëwëmö incæ wæmö incæ mönö Awënë quïmö ïnömö inte quëwëninque tömengä quïmö inte edæ wæmpa. ⁹ Edæ do wængainäni beyæ ante mümö quëwëmö beyæ ante Codito tömämö Awënë nänö baquinque edæ wænte ñäni ömæmongacäimpa.

¹⁰ Bitö guiquënë bitö tönïñacä ingante ædö cæte apænte ämii. Ayæ bitö tönïñacä ingante, Önömique bai ïimpa, ante quïnante ämii. Edæ Wængongui nänö apænte anguimpaa gäänë ongöñömonte tömengä tömämö ïmonte apænte ancæcäimpa cæbii. ¹¹ Edæ Wængongui beyæ ante ïmaï ante yewæmonte on-gompa.

“Mönö Awënë incæ, ‘Në Quëwëmo ïnömö inte edæ ämo ëñëedäni,’ angampa.

Ayæ, ‘Minitö tömämïni botö önöwa ïnö da guicapod-
inque,

Bitö Wængongui ïnömi ïimpa, ante adoyömö apænecæminimpa,’ angampa.”

¹² Ante näni yewæmongainö bai ïinque cædinque mönö tömämö Wængongui weca ponte ongöninque mönö pönengainö ante mönö apænegainö ante mönö cægainö ante tömengä ingante edonque pönï apænecäimpa.

Wacä oda cæcæcäimpa, ante cædämaï incæbiimpa, ante

¹³ Mänömaï beyæ mönö wacä ingante apænte änämaï ingæimpa. Wæætë minitö, Waa cæcæboimpa, ante nämä wææ cædinque, Botö

töniñacä taadö nänö goquino ante ee acæboimpa, ante pönëedäni. Tömengä tee tewate bai oda cädämaï incæcäimpa, ante nöingä cæquinque ante pönencæminimpa. ¹⁴ Botö iñömö Itota Codito nempo quëwëmo inte edæ nöingä pönëninque, Tömää cænguï nämä incæ näwäaquiringä impa, ante do ëñëmopa. Incæte wacä, Pancaa cænguï baacä impa, ante në pönengä inte tömengä beyæ baacä iñonte tömengä nänö, Baacä impa, änö cænämaï inguënengä ingampa.

¹⁵ Bitö quingämë cæmi adinque bitö töniñacä, Baacä apa cæwëe, ante wæwente bacä ininque bitö waadedämaï inte godömenque cæmaïmipa. Edæ bitö töniñacä beyæ Codito wængacäï apa quëwëe. Bitö töniñacä nänö pönënämaï bate wænguinque baö cæmipa, ante wædinque bitö tömengä ingante näwangä waadete pönëmi inte tömengä beyænque ante cöwë baö cænämaï incæbiimpa. ¹⁶ Botö mänömaï cædinque waa pönï cæbopa, ante pönëmi incæte wadäni bitö waa cädö ante, Wiwa cæbipa, ante pönö babæ ante tedewënäni ate wædinque bitö wæætë waadete pönëninque wææ ämi tedewënämaï incædänimpa. ¹⁷ Wïi cænguinque ante wïi bequinque ante Wængonguï nempo quëwëmompä. Wæætë Wængonguï Tæiyæ Waëmö Önöwoca nempo quëwëñömönte tömengä pönö cæcä æninque mönö nö entawenguinque impa. Ayæ mönö gänë pönenguinque ante mönö watapæ tote quëwenguinque ante tömengä nempo quëwëmompä. ¹⁸ Edæ Codito nempo quëwëninque waocä mänömaï cæcä adinque Wængonguï tömengä ingante waa ate tocampä. Waodäni

adobai, Waa cæbipa, ante waa adänipa.

¹⁹ Mänömaï impa, ante adinque, Mönö pönencabo godongämæ piyænë cæte quëwengæimpa, ante, Ayæ mönö godongämæ wede pönëninque tæi mænonte bai ongongæimpa, ante mönö nanguï cæcæimpa. ²⁰ Ìinque cænguï cæinente beyænque bitö Wængonguï nänö në badongainäni inänite bæ tadämaï incæbiimpa. Tömää cænguï edæ näwaaquingä impa. Incæte bitö cæninö beyænque wacä ëñënamäi inte tee tëwate bai oda cæbaingampa, ante do ëñëmi inte bitö godömenque cæmi ìinque wïwa cæbaimipa töö. ²¹ Waa cæcæte ante bitö iïmaï cæcæbiimpa. Bitö baö cæmi beyæ, biinömæ nani wædænque ti nämæ bebi beyæ, quiëmë cæbi beyæ bitö tönïñacä oda cæte wæcantawo. Ìinque bitö iñömö, Botö tönïñacä oda cædämaï incæcäimpa, ante wææ cædinque ee cædämaï ìmi ìinque waa ìmaimpa.

²² Mäninö, Æbänö cæte waa inguïi, ante bitö pönënö beyænque wadäni inänite apænte änämaï inte bitö adobique inte Wængonguï ayongante cæcæbiimpa. Waa cæqui impa, ante mimöno bitö pönënonque ante mäninonque cædinque bitö tente wæquinque cædämaï inte waa tobaïmipa. ²³ Wæætë në æmä pönengä guiquënë, Cæmo beyæ Wængonguï pangä wæcæ wæ, ante wædingä inte tömengä nämä nänö apænte pante wæquinque ade cængampa. Edæ æcänö wede pönënamäi inte cæda tömengä nänö cædönö tömänö edæ wïwa cætimpä. Ìinque bitö cædö tömänö wede pönente cæcæbiimpa.

15

Wadäni incæ watapæ quëwencädänimpa, ante cæe, ante

¹ Mönö nē wede pönēmō iñömō tæi piñænte entawēmō inömō inte nāmanque ante mönō cæinēnō ante edæ wädāmaï ingæimpa. Wæætē edæ nē æmæ pönēnāni guiquēnē tōmēnāni aquī pōnī ināni inte, Ædō cæte cæquimoo, ante wädāni adinque mönō tōmēnāni wädō ante ænte mongænte bai cædinque tōmēnāni tönō iñacabo cæcæimpa. ² Godongāmæ godō cæmō æninque waa toдинque tōmēnāni wæætē wede pönēninque oncō tæi mænonte bai tæi ongoncädänimpa, ante mönō ædæmō cæcæimpa. ³ Edæ mönō Codito incæ nāmanque ante nānō cæinēnō ante cæcæte ante edæ wädāmaï inte piyænē cægacäimpa. Wængonguï ingante do nāni apænegainō bai tōmengä wadäni beyænque ante cægacäimpa. “Wængonguï ëñēmi. Wadäni bitō imite piinte badete tocæte ante cædinque botō imote wæætē piinte badete todänipa,” ante apænete bai Codito ee cægacäimpa. ⁴ Edæ mönō imonte odömōnte apænecæte ante Wængonguï angä ëñēninque dodäni tōmantaa yewæmongadänimpa. Ìninque mäninta ædæmō adinque wampo pönēninque wæntædāmaï inte ee cæmō ìninque edæ mönō, Watapæ bacæimpa, ante pönente tocæimpa.

⁵ Ìninque Codito Itota miñæ tee empote goyōmōnte Wængonguï iñömō edæ, Minitō wampo pönēninque wæntædāmaï inte ee cæcæminimpa, ante nē ædæmō cæcä ingampa. Tōmengä mänōmaï pönō cæcä ate minitō iñömō adoyōmō ante mīni

pönencabo bacæminimpa, ämopa. ⁶ Mänömaï bamïni ïnïnque mïnitö äanque bai adodö ante pönëninque ïïmaï ante Wængonguï ingante apænecæminimpa. Mönitö Awënë Itota Codito Mæmpobi ïnömi inte bitö tömengä Wængonguï adobi ïmi ïñömö bitö tæï emömi inte ñäö apäite bai ïmi amönipa, ante adoyömö ante apænecæminimpa, ante botö mänömaïnö ante yewæmömopa.

Oodeoidi inämaï inäni eñencædänimpa, ante

⁷ Codito mïnitö ïmïnite Ao ante ængacäimpa. ïnïnque tömengä mïnitö ïmïnite nänö ængai bai mïnitö adobai wacä ingä wacä ingä godongämæ Ao ante æedäni. Mänömaï cæmïni adinque wadäni Wængonguï ingante apænedinque, Bitö waa pönï cæbi amönipa, ante watapæ pönï apænecædänimpa. ⁸ Edæ apænebo eñeedäni. Mönitö mæmæidi inänite Wængonguï, Minitö beyæ pönö waa cæcæboimpa, angacäimpa. ïnïnque, Wængonguï tömengä nänö angainö ante cöwë cæcæcäimpa, ante oodeoidi eñencædänimpa, ante cædinque mönö Codito tömënäni beyæ në cæcä bagacäimpa. ⁹ Tömengä ïñömö, Idægoidi inämaï inäni incæ Wængonguï ingante, Bitö ñäö bai emömi inte pönö waadete waa cæbi æmönipa, ante apænecædänimpa, ante mänömaï cægacäimpa. ïïmaï ante Wængonguï beyæ nani yewæmongainö bai impa.

“Botö mänömaï beyæ, Bitö æbänö në waa cæbi ïmii, ante idægo inämaï inäni weca gote apænecæboimpa.

Bitō emōwo ante ämotamīni watapæ pōnī ancæboimpa,” ante nāni yewæmongainō bai Codito cægacäimpa.

¹⁰ Ayæ wataa iñömō iīmaī ante yewæmongatimpa. “Idægoidi ināmaī imīni incæ mīnitō Wængonguī quīnāni tōnō godongāmæ watapæ toedāni.”

¹¹ Ayæ wæætē,
“Idægoidi ināmaī imīni mōnō Awēnē ingante apænedinque, Bitō waa pōnī cæbi amōnipa, ante watapæ pōnī apæneedāni.

Wamīni mīni cabo mīni cabo tōmāmīni ämotamīni ante bai apænedinque, Waa pōnī cæbi amōnipa, ante watapæ pōnī apæneedāni.”

¹² Itaiya wodi adobainō ante yewæmongacäimpa. “Inguipoga quēwēnāni tōmānāni Awēnē baquinque

Awænguinto tā bocate bai cædinque Yæte Pæingä iñömō ængæ ganticæcäimpa.

Tōmengä cæcä beyænque watapæ bacæimpa, ante idægoidi ināmaī ināni incæ pōnencædānimpa,” ante Itaiya wodi yewæmongacäimpa.

¹³ Wængonguī iñömō, Watapæ bacæimpa, ante nē badongaingä inongä inte iīmaī cæcæcäimpa, ämopa. Tōmengä Tæiyæ Waēmō Önōwoca tæi piñænte cæcä ate mīnitō, Watapæ bacæimpa, ante godōmenque wede pōnencæmīnimpa. Mānōmaī cæcæte ante cædinque Wængonguī pōnō apænecä ēñēninque mīnitō tōmengä ingante wede pōnēninque edæ gānē entawēninque watapæ tocæmīnimpa, ämopa.

¹⁴ Botō tōniñamīni ēñēedāni. Botō tōmēmo ayōmote mīnitō nē waa cæmīni imīni abopa.

Ayæ, Æbänö waa cæquï, ante do ëñëmini iminipa. Ayæ adobai minitö eyepæ imini inte wacä ingä wacä ingä do odömonte apænemini iminipa, ante pönëmopa. ¹⁵ İninque botö, Minitö ëñëninö ante minitö ocai encadömini inte edæ adodö ante pönencæminimpa, ante bai cædinque pancadea ante yewæmontabopa. Botö iñömö Wængongui waadete pönö cæcä ænte në entawëmo inte mänömainö ante yewæmöninque edæ guiñënamai inte nanguï ante yewæmömopa. ¹⁶ Edæ tömengä waadete pönö cæcä ænte entawëninque botö Itota Codito beyænque ante idægoidi inämai inäni inänite në cæbo badinque Wængongui ingantedö ante watapæ apænebo ëñënanipa. Mänömainö ante apænebo ëñëñöminite Wængongui Tæiyæ Waëmö Önöwoca pönö badongä ate idægoidi inämai inäni incæ tæiyæ waëmö ewocate quëwënanï badänipa. Mänömai bayönänite botö iñömö, Wængongui quï, ante pædæ godönäni bai cædinque tömënanï inänite ante edæ, Wængongui quïmini bacæminimpa, ante pædæ godömo æninque Wængongui wæætë waa tocampa.

¹⁷ Mänömai beyæ botö Itota Codito nempo quëwëninque Wængongui beyæ cædinque edæ nanguï tobopa. ¹⁸ Codito botö tönö guëa cæcä beyænque botö nanguï apænedinque nanguï cæbo ate tömengä iñömö töö æmængä pöninque edæ idægoidi inämai inäni incæ edæ Wængongui ingante ëñente cædäni badänitapa. Botö Codito mänömai botö tönö nänö cædinö ante apænedinque edæ mäninque ante apænedinque guiñënete wædinque godömenque apænedämai incæboimpa. ¹⁹ Wængongui Tæiyæ Waëmö Önöwoca

tæi piñænongä inte botö tönö godongämæ cæcä ate botö, Eñencædänimpa, ante bamönengæ cæbo ate nē pönēnāni badānitapa. Mänōmaï Eedotadēē iñōmō mā cæte godinque Ididiabæ ganca tōmāo godāmæ godinque botö Codito ingantedö ante watapæ apænedinque adodö adodö ante tōmänö ante apænebo eñēnānitapa.

²⁰ Botö, Codito emōwo ante wadāni nāni apænedāmaï iñōmō gote tōmengä ingantedö ante watapæ apænebo eñencædänimpa, ante cōwē goinente wætabopa. Wacä onguitanca nānō tæñōnincōnē æmonga mænōnāmaï incæboimpa, ante bai cædinque botö, Wacä do nānō apænediñōmō botö wæætē apænedāmaï incæboimpa, ante cætabopa. ²¹ Wæætē iūmaï ante Itaiya wodi nānō yewæmongainö bai cætabopa.

“Tōmengä ingante ante eñēnāmaï iñināni incæ edæ do ate bai ewocacædänimpa.

Önōmonca eñēnāmaï iñināni incæ edæ, ‘Æbānō i; ante do eñencædänimpa.”

Ante nānō yewæmongainö bai botö, Eñencædänimpa, ante cætabopa.

Odömā iñōmō pöinēmopa, Pabodo angampa

²² Mänōmaï beyæ botö mīnitö weca poncæ cæyōmote edæ, Wææ cæte i, ate wædinque pōnāmaï intabopa. ²³ Iñōmō ömæ idæwaa cæbo inte botö æpomē wadepo iñonte mīnitö imīnite aīnente wædōmopa. ²⁴ Iñinque botö, Iñcayæ ate Epāñabæ gocæ cædinque wodo tebæ godinque mīnitö weca eñate aboque gocæboimpa, ämopa. Edæ botö wantæpiyæ eñate tote quēwente ate godömenque

Epāñabæ gote cæyōmo mīnitō botō beyæ cædinque da godōmīni gocæboimpa.

²⁵ Ñōwo guiquēnē botō tāno Eedotadēē iñōmō Wængonguī quīnāni beyæ godō cæcæte ante gobopa.

²⁶ Wængonguī quīnāni incæ Eedotadēē quēwēnāni pancadāniya ōmæpodāni inte wædānipa, ante pōnente wædinque wabæca Mæatedōniabæ quēwēnāni tōnō Acayabæ quēwēnāni tōnō, Mōnō da godō da godō cæcæimpa, ante pōnēninque watapæ todirque tōmēnāni, Wængonguī quīnāni quī, ante do godōnānitapa.

²⁷ Mānōmānō ante watapæ pōnente cædāni incæte tōmēnāni Eedotadēē iñōmō quēwēnāni inānite nē godonguēnēnāni inte da godōnānimpa. Edæ Wængonguī Ōnōwoca nānō pōnongaincoo ante idægoidi pōnō apænedāni ēñente ænte ēwocadināni inte wabæca quēwēnāni iñōmō tōmēnāni nāni ēadincoo incæ idægoidi beyæ ante wæætē godonguēnēnāni badīnāni inānipa.

²⁸ Īnirque botō iñōmō mānircoo tōmēnāni nāni da godōnircoo idægoidi weca ænte gocæboimpa. Godirque botō cōwā adirque, Nē ōmæpodāni inte nē wædānirque æncædānimpa, ante wææ cæcæboimpa. Ædæmō cæbo ænāni ate botō māniñedē ate Epāñabæ gocæte ante cædirque mīnitō ōmæ wodo tebæ godirque mīnitō weca ēñacæ poncæboimpa.

²⁹ Codito pōnō waa cædirque da pōnongā pōnirque botō cōwē tōmengā tōnō waa pōni botō cæquirque mīnitō weca poncæboimpa, ante do ēñēmopa.

³⁰ Botō tōniñamīni ēñēedāni. Botō pæ pagænte bai nanguī cæyōmote mīnitō iñacabo cædirque botō beyæ Wængonguī ingante nanguī apæneedāni,

ante botö mönö Awënë Itota Codito beyænque äninque ayæ Wængongui Önöwoca në waadete pönengä beyænque äninque mīnitö imīnite nanguī ämopa. ³¹ Oodeabæ pönēnāmaī ināni iñömö Pabodo ingante wēnæ wēnæ cædāmaī incædānimpa, ante botö beyæ ante apæneedāni. Ayæ, Eedotadēē iñömö botö gote cæbo adinque Wængongui quīnāni incæ botö cædö ate Ao ancædānimpa, ante apæneedāni. ³² Mänömaī i adinque botö, Awënë Wængongui angä ate botö watapæ todinque mīnitö weca pömo ate mönö godongämæ guēmāninque wampo pönengæimpa, ämopa. ³³ Wængongui në gänē pönengä inte mīnitö tönö godongämæ ongöninque pönö cæcä ate gänē pönencæmīnimpa, ämopa. Mänömaī impa diyæ, ante botö, Amēē, ämopa.

16

Waa quēwencæmīnimpa, ante

¹ Botö iīmaī ämopa. Mönö tönīñacä tömengä emöwo Pebe mīnitö weca ñöwo poncæ cæcampa. Tencodea iñömö Codito ingante nāni godongämæ pönencabo iñönānite tömēnāni beyæ në waa cæcä inte iingä onquiyængä iñömö waingä pōni ingampa. ² Tömengä nanguī ināni beyæ wææ gompodinque waa cædongä inte botö beyæ adobaī nanguī cæcantapa. İninque edæ botö mīnitö imīnite iīmaī ämopa. Wængongui quīmö inömö inte mönö Awënë nempo quēwēñömonte Pebe adocä inte adobaī ingampa, ante adinque mīnitö tömengä ingante waa adinque Ao ante æedāni. Ayæ

tömengä quïemë æinente wæcä iñongante mïnitö wæætë edæ godö cæedäni ämopa.

³ Ayæ wada Piditida tönö Aquidæ nāna gæncaya iñömö Itota Codito nempo quëwëninque edæ botö tönö godongämæ cæda inapa. Ìninqe mïnitö tömëna inate, Waa quëwencæminaimpa, ante botö beyæ ante apænemïni ëñcædaimpa. ⁴ Wadäni botö imote wænoncæ cædäni wæyömote tömëna nāna wodo wænguinque edæ botö imote wææ cædatapa. Mänömaï cædapa, ante botö tömëna inate waa ate pönente apænebopa. Ayæ idægoidi ināmaï ināni Codito ingante nāni wayömö pönencabo wayömö nāni pönencabo adobaï tömänāni Aquidæda nāna cædinö ante ëñëninque tömëna inate waa ate pönëninque apænedänipa.

⁵ Ayæ Itota Codito ingante në pönënāni Aquidæda oncönë godongämæ pö guidäni inānite, Waa quëwëedäni, ante apænemïni ëñncædänimpa. Botö æmigo Epëneto botö në waadecä iñongante mïnitö botö beyæ apænedinque, Waa quëwencæbiimpa, ante apæneedäni. Atiabæ iñömö Codito ingante wadäni pönënāmaï iñönāni tömengä iñömö täno pönengantapa. ⁶ Ayæ Mäadiya mïnitö beyæ nanguï cædingä iñongante mïnitö wæætë tömengä ingante Waa quëwencæbiimpa, ante apæneedäni. ⁷ Botö guidëna Antodönico tönö Ññiatio iñömö botö tönö godongämæ tee mönete wædina inapa. Tömëna iñömö botö pönënāmaï iñömote wëenëñedë Itota Codito nempo quëwëna iñönate Codito incæ tömëna inate da godongacäimpa. Ìninqe, Itota Codito nänö në da godongaina tänoda ina

adinque mīnitō botō beyæ ante tōmēna īnate waa apæneedāni.

⁸ Ayæ wacā mōnō Awēnē nempo quēwēnīnque Ampīdiato ingante waadete pōnēmo inte edæ botō, Waa quēwencæbiimpa, āmopa. ⁹ Ayæ adobaī Odōmāno mōnitō tōnō godongāmæ Codito nempo quēwente nē cæcā īñongante, Waa quēwencæbiimpa, ante botō beyæ ante apæneedāni. Botō

nē waadecā Etaquito ingante adobaī ante apæneedāni. ¹⁰ Ayæ Apede īñōmō Codito nempo quēwēñongante tōmengā æbānō cæcāā, ante adinque Codito tōmengā ingante wæætē, Waa cæbi abopa, angampa. Tōmengā ingante botō beyæ ante waa apæneedāni. Ayæ Aditobodo nāni quēwencabo īnānite adobaī waa apæneedāni.

¹¹ Botō guīdengā Edodiyaōnō ingante waa apæneedāni. Ayæ Nāadotito guīdēnāni incæ æcānō mōnō Awēnē nempo quēwēna tōmēnāni īnānite adobaī, Waa quēwencæmīnīmpa, ædāni.

¹² Ayæ wada mōnō Awēnē nempo quēwēna onquiyæna Tidipīna tōnō Tidipota īñōmō nē nanguī cæda īnapa. Tōmēna īnate botō beyæ ante waa apæneedāni. Ayæ wacā onquiyængā mōnō nē waadecā Pedetida īñōmō tōmengā mōnō Awēnē nempo quēwēnīnque nanguī cæcantapa. Tōmengā ingante adobaī, Waa quēwencæbiimpa, ædāni.

¹³ Ayæ mōnō Awēnē nānō nē apænte ængaingā Odopo ingante waa apæneedāni. Tōmengā badā incæ adobaī botō badā baī īñōnante tōmēnā īnate botō beyæ ante waa apæneedāni. ¹⁴ Ayæ adobaī Atīncodito, Pedegonte, Edēme, Patodobato, Edēma tōmēnāni nāni pōnencabo tōmānāni īnānite, Waa quēwencæmīnīmpa, ante apæneedāni. ¹⁵ Ayæ

wadāni Pidodogo tönö Oodia, Nēedeo tōmengā mængā tönö, Odimpa tönö Wængonguī quīnāni tōmānāni inānite, Waa quēwencæmīnīmpa, ante apæneedāni.

¹⁶ Edæ, Waa quēwencæmīnīmpa, ante mīnicabo incæ tōmāmīni godongāmæ waa waadete apænecæmīnīmpa. Codito ingante wayōmō nāni pōnencabo wayōmō nāni pōnencabo tōmānāni mīnitō imīnite wæætē, Waa quēwencæmīnīmpa, ante ānānīpa.

¹⁷ Botō tōnīñamīni ēñēedāni. Mīnitō adocabomīni iñōmīnite wadāni æmæmoncadō æmæmonca pā cædāni inānite cōwā adīnque edæ Baa æedāni. Doyedē mīnitō ēñēnō ante ēñēnāmaī ināni inte tōmēnāni, Mīnitō tee tēwate baī oda cæcæmīnīmpa, ante cædīnque wadō ante edæ odōmōnānīpa cæmīnīi. Tōmēnāni inānite gomō aquēnē cæmīnīi.

¹⁸ Mānōmaī cædāni iñōmō mōnō Awēnē Codito ingante cædāmaī inte nāmā nāni cæīnēnonque ante cædānīpa. Tōmēnāni ante, Mīnitō imīnite waa amōnīpa, ante waa tedete baī tededāni ēñēnīnque pancadāniya guīquēnē, Babæ wapiticæ impa, ante cōwā adāmaī ināni inte, Nō impa, ante do pōnēnānīpa.

¹⁹ Mīnitō cōwē ēñēnte cæmīni imīnīpa, ante tōmānāni do ēñēnānīpa. Mānōmaī beyæ botō iñōmō nanguī tobopa. Incæte, Quīnō waa cæquīī, ante mīnitō ædæmō ēñencæmīnīmpa, ante aīnēmopa. Quīnō wēnæ wēnæ cæquīī, ante edæ ædæmō ēñēnāmaī inte edæ gomō acæmīnīmpa, ante aīnēmopa. ²⁰ Wængonguī, Gānē pōnente quēwencæmīnīmpa, ante nē pōnō cæcā iñōmō edæ Tatāna ingante mīnitō ōnōwa gāānē wææntodongā ate mīnitō wæætē do pīnā

gäwate bai cæcæminimpa. Ñowo iñömö mönö Awënë Codito nänö waadete pönö cædö incæ entawencæminimpa, ämopa.

21 Botö tönö guëa cædongä Tımoteo iñömö minitö iminite, Waa quëwencæminimpa, angampa. Ayæ botö guidënäni Dotio tönö Yatönö adobai Totipatedo adobai minitö iminite, Waa quëwencæminimpa, änänipa.

22 Ñowo botö Tedetiyobo iñömö Pabodo önöneque tedecä ëñëninque iï cadota ante në yewæmönimo inte botö adobai, Waa quëwencæminimpa, ämopa.

23 Gayo adobai minitö iminite, Waa quëwencæminimpa, angampa. Tömengä oncönë Codito ingante nani pönencabo cöwë godongämæ ponte apænedänipa. Ayæ tömengä botö imote adobai, Pöe, angä ëñëninque edæ botö ñowo tömengä oncönë owobopa. Ayæ iñömö quëwënäni awënë nänö äinta æninque adocanque Edaato nani änongä iñömö tömengä, Tömänäni beyæ æbänö cæquii, ante në angä iñömö tömengä tönö mönö tönïñacä Coadoto adobai, Waa quëwëedäni, änapa.

24 Mönö Awënë Itota Codito minitö iminite pönö waadete cæcæcäimpa. Mänömaï impa, ante botö, Amëë, ante ämopa.

Wængonguï ingante waa ate apænecæimpa, ante

25 Ñowo iñömö Wængonguï ingantedö ante watapæ botö apænedö ante ayæ Itota Codito ingantedö ante mönö apænedö ante në pönëmini inte minitö tæi piñænte ongoncæminimpa. Wængonguï eyepæ inte mänömaï pönö cæcæcäimpa. Tömengä mäninö ante ñowo tæcæ

nänö odömönö ante wëenëñedë pedæmämö iñonte cöwë wantæpiyæ wë wodonte bai cægacäimpa. ²⁶ Ñöwo guiquënë, Codito æbänö cægacäi, ante inguipoga tömämæ quëwënäni ëñente wede pönëninque botö imote ëñente cæcædänimpa, ante cædinque Wængongui cöwë në Quëwëngä inte do odömongä acæimpa. Tömengä angä ëñëninque tömengä beyæ në apænegaïnäni wæætë edonque pönï yewæmönäni acæimpa.

²⁷ Ìninque Wængongui nö pönï ëñëngä inte adocanque Wængongui ingampa, ante adinque mönö, Bitö adobique ñäö bai ëmömi inte edæ waa cæbi amönipa, ante mönö Itota Codito ëmöwo apænedinque Wængongui ingante edæ cöwë apænecæimpa. Mänömaï impa diyæ, ante botö, Amëë, ämopa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690